

# 1 KORĪTO

## Merepanika Paoro

### Iokanatsopatakiti Korīto

### Auakanimoni

<sup>1</sup> Nota Paoro, Xesosi Kristo iokanatakitino. Teoso akiritano iua iokanatakiti nininiua ĩkapani, kotxi inirekari iokanatinino kãkitimoni isãkire nisãpiretini ĩkapani. Aĩtari Sóseni inakori aua notakata uai. <sup>2</sup> Niokanatsopata hĩtemoni, kãkiti Xesosi sãkire auĩãkani Korĩto sitatxiti auakanimoni. Kristo Xesosi makatxakakini hĩtxaua Teoso ĩkapani. Teoso akiritai hĩte iua nakitiakori hininiua ĩkapani. Apaka niokanatsopata ikini tĩpati auakanimoni, aãũte Xesosi Kristo uãka akiritakanimoni. Ate auĩte Xesosi, ninoa auĩte apaka itxaua. <sup>3</sup> Aĩri Teoso, Apiananiri Xesosi Kristo pakini sikari ikinipoko erekari hĩtemoni. Ninoa kamaerekaxiniretai hĩte.

#### *Paoro Misãkiretari Teoso Korĩto Auakani ĩkapani*

<sup>4</sup> Ātipirika nimisãkiretari Teoso ia atoko: “Peerekai pite, kotxi Xesosi Kristo sikari ikinipoko erekari Korĩto auakanimoni. Ikara erekari pite sikakiti. <sup>5</sup> Peerekai pite, kotxi pite kamaerekatari ninoa auini. Pite oerekana ninoa sãkire atão inini ĩkapani. Pite kamaimaroretana. Ininiã ninoa sãkire apiaerekata. Ninoa imarore apiaãpota.” Ia atoko nimisãkiretari Teoso.

<sup>6</sup> Hĩtemoni asãpiretakiti Kristo pirena auapeka hãkixinireẽ. Ininiã iteene hãuikari Kristo sãkire. <sup>7</sup> Ininiã hiãtapakasaakiri aãũte Xesosi Kristo

kanapiriini, ikini sereti erekari Teoso sikakiti aua hītemoni iua parīka hīkamini īkapani. <sup>8</sup> Hīte isikataparaxiniretiniritika ikanapiriini ōti apokako. Ininiā maerekati hītemoni !auari aāuīte Xesosi Kristo apokasaaki. <sup>9</sup> Teoso kamariko ikara hītemoni, kotxi ikinika isākire iaōka ikamako. Iuakara akiritai hīte, himoianatiniri imi aāuīte Xesosi Kristo.

### *!Homanatakakapeua*

<sup>10</sup> Nitariakori, aāuīte Xesosi Kristo posotiireē nōtākikai. Hīšākire ātinoka hītxako. !Ninirekari homanatakakiniua. Ninirekari ātika hīxinikakiti auini. Ninirekari ātika hinirekakiti auini. <sup>11</sup> Nitariakori, Kroe aapoko auakani sāpiretano hītekakarika hinaiatatakiniua. <sup>12</sup> Kotxi apanakini hīte txari: “Paoro sākirera nota kīpita.” Ātipekana: “Aporo sākirera nota kīpita.” Ātipekana: “Petro sākirera nota kīpita.” Ātipekana: “Kristo sākirera nota kīpita.” <sup>13</sup> !Apakata ikara atoko hīkamini. Kristo !ikaiarikaāka. Kona Paoro ipina aamina ĩpiriāmitakari nopini hīte īkapani. Kona Paoro uākaā hīpatxisataāka.

<sup>14</sup> Nisāpiretari Teoso ereka inini, kotxi kona notani patxisatai hīte. Krispo, Kaio pakininanira nipatxisata. Apikomoni !nipatxisatari kākiti. <sup>15</sup> Ininiā kona kākiti sāpiretari nipatxisatiniri kākiti nota uākaā. <sup>16</sup> Īi. Nimaxinīkaretari. Nipatxisatari Esitēpana, iua aapoko auakani pakini. Apikomoni nipatxisatakini !nixinikaika. <sup>17</sup> Kristo kona iokanatano nipatxisarauatini īkapani. Iokanatano Teoso iokanapirena erekari nisāpiretini īkapani. !Inirekari kākiti sākireē, kākiti imaroreē nisāpirenauatini, kotxi kākiti imarore

! isāpiretari Kristo ipinini aamina ĩpiriāmitakari nopini amaerekani imakatzakini ĩkapani.

### *Teoso Imarore*

<sup>18</sup> Teoso sākire mauiākani uākatari ! kiūkiteri kākiti Kristo ipinini aamina ĩpiriāmitakari nopini sāpiretakani. Atepekana, Kristo ipinini sāpiretiko oerekari Teoso posotiire, kotxi Kristo ipinini makatzakari amaerekani. <sup>19</sup> Teoso sākire iōkatsopatakori kitxakapirīka txari:

Nixipokariko ĩkorapokoriti kimarorerini imarore.

Nixipokariko kiūkiterini iūkite.

Itxa Teoso kitxakapirīka. <sup>20</sup> Ĩtapari kimaroreri? Ĩtapari apaiaōkarauatakari? Naniparari kaxinikareri ĩkorapokoritikiri? Teoso oerekapekari ĩkorapokoritikiri imarore miūkiteti imarore atokotxikana inini. <sup>21</sup> Paimatireri Teoso, kotxi ! auiritari ĩkorapokoriti auakani imarotiniri iua ninoaka imaroreē. Apanakinimoni Kristo sākire sāpiretiko !kiūkiteri, iuaritika Teoso apokaerekatari imakatzakiniri kākiti maerekani, Kristo sākire sāpiretiko auikasaakina.

<sup>22</sup> Xoteoakori nirekari atamatiniri Teoso takaōtxikare, isākire auikinina ĩkapani. Krekoakoripekana nirekari imaroretxi apiari imarotini. <sup>23</sup> Iuaritika ate sāpiretari Kristo ipinini ĩpiriāmitakari nopini amaerekani imakatzakini ĩkapani. Xoteoakori ! inirekari ikara asākire auikinina. Krekoakoripekana uākatari ikara asākire miūkiteti sākire inini. <sup>24</sup> Iuaritika Teoso akiritakini aua Xoteoakori, Krekoakori pakini. Ninoamoni Kristo parīka oerekari Teoso posotiire. Iua parīka oerekari Teoso imarore. <sup>25</sup> Kākiti uākatari Teoso imarore ! kiūkiteri, iuaritika

axapitiki Teoso imarore apiata. Ikinipoko kākiti imarore poiãoka. Axapitiki Teoso tapara apiata. Ikinipoko kākiti tapara poiãoka.

<sup>26</sup> Nitariakori, Teoso akiritakasaakii, hīxinikari kākiti xinikakiti atokokana. Natokopa itxa hīte iuasaaki? Iuasaaki !kimarorei. !Ķaposotiirei iuasaaki. Auñtetxi !hītxaau iuasaaki. Itori hīte ikara atoko inakani iuasaaki. <sup>27</sup> Teoso mereēri kākiti. Īkorapokoriti auakani uākatari ninoa kākiti Teoso mereēkini miīkiteni ininiua. Imereēna ninoa, kimaroreni Īkorapokoriti auakani pētauatini ĩkapani. Īkorapokoriti auakani uākatari ninoa kākiti Teoso mereēkini iōkapetakani ininiua. Imereēna ninoa, katapararini ĩkorapokoriti auakani pētauatini ĩkapani. <sup>28</sup> Iua mereēri kākiti. Īkorapokoriti auakani uākatana ninoa Teoso mereēkini minakani ininiuana. Imereēri apanakini manirekakini. Imereēri kākiti omanatakoni. Kinirepa Teoso mereēri kākiti ikara atoko inakani? Teoso oerekari kākiti, kākiti uākatakiti apiari inini na atão. <sup>29</sup> Ikara atoko ininiã, kākiti ! iposotari iuikiniua Teoso apisatoõ. <sup>30</sup> Teosora txīkitakaua Xesosi Kristo nakitiakori aniniua. Kristo nakiti aniniãua, aimarotari imaroretxi atão inakari. Kristo txīkitakaua atão inakari akamini Teoso apakapiniua ĩkapani. Iua txīkitakaua Teoso nakitiakori aniniua ĩkapani. Iikixirauata ate ĩkapani ipīkasaaki.

<sup>31</sup> Teoso sãkire iōkatsopatakori txari:  
! Apakata piuikiniua. Apakatapitika piuikiniri  
Apiananiri.

## 2

*Xesosi Ipinini Īpiriãmitakari Nopini*

<sup>1</sup> Nitariakori, napokasaaki hītemoni, nisāpiretai Teoso sāpiretakiti. Kona nisāpiretai notaka sākire nimature. Iuasaaki kona noerekai notaka imarore. Teoso sākirenoka nisāpiretai hīte. <sup>2</sup> Hītekata nauakasaaki, na ninirekari āti imaroretxi nimarotini. Ninirekari Xesosi Kristonoka nisāpiretinii. Apiata ninirekari nisāpiretinii iua ipinini kākiti ikapani ĩpiriāmitakari nopini. <sup>3</sup> Hītekata nauakasaaki kona kataparaxinireno. Nikikinanaka nipīkarauatini xika. <sup>4</sup> Iuasaaki kona kākiti imaroreēni nisākirauata. Kona kākiti imaroreēni ninirekari hāuikiniri Teoso iokanapirena nisāpiretakiti iuasaaki. Teoso iokanapirena nisāpiretakasaaki, kākiti imarotari Erekari Matamatakoti posotiireē nisākirauata. <sup>5</sup> Ininiā kona kākiti imaroreēni hāuikari Teoso iokanapirena. Hāuikari Teoso iokanapirena Teoso posotiireē.

### *Erekari Matamatakoti Imarore*

<sup>6</sup> Teoso sākire auīākani iteene ākixinireē aneēkani imarotari Teoso iokanapirena asāpiretakiti kimatireri inini. Ikara imaroretxi kona ĩkorapokoriti auakani imaroreni. Kona auītetxiakori imaroreni ikara imaroretxi. Kotxi ninoa imarore paītiki ! auaika. <sup>7</sup> Asāpiretari Teoso imarore mitxi kākiti mimarotakiniti, kotxi Teoso kipatari. Itixi kamiko apisa Teoso nirekaua asāpiretiniri ikara imarore kākitimoni ate iotximere aāpakapini ikapani. <sup>8</sup> Auītetxiakori ĩkorapokoriti auakani ! imarotari ikara Teoso imarore. Ninoa imarotaākamariko, ininiā ! okamarinako Apiananiri kaiotximereri aamina ĩpiriāmitakari nopini. <sup>9</sup> Kitxakapirīka Teoso sākire iōkatsopatakori txari:

Kākiti oki !atamatapanikari Teoso kamakiti tīkane iua tiretakani īkapani. Kākiti kenakoki !ikenakotapanikari Teoso kamakiti tīkane iua tiretakani īkapani. Kākiti !ixinikapanikari Teoso kamakiti tīkane iua tiretakani īkapani.

<sup>10</sup> Iuaritika Teoso oerekapekaua Erekarī Matamatakotiā. Ikinipoko imarotakari itxaua Erekarī Matamatakoti. Ikinipoko kipatakori Teoso imarore imarota. <sup>11</sup> Kākiti ākixinirenoka imarotari iuaka ixiniākiti. Āti ! imarotari iua xiniākiti. Iua atokokanera Erekarī Matamatakotinoka imarotari Teoso xiniākiti, kotxi Teoso itxaua iua. <sup>12</sup> Kona ate apakapari ātiāo matamatakoti īkorapokoritikiri. Ate apakapari Erekarī Matamatakoti, Teoso iokanatakiti atemoni, ininiākara aposotari aimarotiniri Teoso sikakiti atemoni. Itori isikakiti.

<sup>13</sup> Atemoni isikakiti asāpireta. Kona kākiti imaroreēni asāpiretari kākiti. Erekarī Matamatakoti oerekaua asāpirenauatini. Ate atamatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aātamatarī iua oerekakiti, ininiā iusaaki aimarotari atāo. Ikara atoko aōerekai hīte. <sup>14</sup> Erekarī Matamatakoti mauakiniti ! apakapari Erekarī Matamatakoti oerekakiti, kotxi iuamoni ikara sākiretxi mīkiteti sākire. ! Iposotari imarotiniri Erekarī Matamatakoti sāpiretakiti, kotxi Erekarī Matamatakoti ! auari iuamoni. <sup>15</sup> Erekarī Matamatakoti auakasaakiri kākiti, iusaaki iposotari ataerekatiniri imakinika, ininiā kākiti Erekarī Matamatakoti mauakiniti ! iposotari apoītiniri iua.

<sup>16</sup> Teoso sākire iōkatsopatakori txari:

Kiripa imarotatari Apiananiri xiniākiti iua oerekini ĩkapani?  
Iuaritika Kristo oerekaua iuaka xiniākiti.

### 3

#### *Teoso Nitiriakori Atxaua*

<sup>1</sup> Nitiriakori, hīte !ikamari ikinipoko Erekarī Matamatakoti nireēkiti. Hīkamari hīteka nireēkiti ĩkorapokoriti auakani kamini atokokana. Ininiākara nisākirauata hītekata amarīnikata nisākirauatini atoko, kotxi poiāonoka hāuikari Kristo sākire. <sup>2</sup> Tinitxiā atoko inakari nisākire nisikai. Xinitxi atoko inakari nisākire kona nisikai, kotxi !himīteenekari nisākire kamimari. Uatxapiima hīte ! iposopanika noerekakiti kamimari himarotini. <sup>3</sup> ĩkorapokoriti auakani xinikini atoko hīxinikapanika. Ikara xika hīxikotakakaua. Hinaiatakakaua. Homanatakakaua. Hīteka nireēkiti hīkama, ĩkorapokoriti auakani kamini atokokana. <sup>4</sup> Kotxi ātikaka hīte txari: “Paoro sākire nikīpita.” Apanakini txari: “Aporo sākire nikīpita.” Ikara atoko hininiā, kākiti ĩkorapokoritikini sākire atoko hīsākirauata. !Kīikitepanikai.

<sup>5</sup> Kiripa Paoro? Kiripa Aporo? Kristo nitiriakorinoka atxaua. Iua sākire sāpiretakaninoka atxaua. Hīte auikapekari Kristo sākire asāpiretakasaakii. Apiananiri sikari parīkatxi ikininapemoni akamini ĩkapani. <sup>6</sup> Ia atoko itxa parīkatxi Teoso sikakiti: Merepanika nota sāpiretari Teoso sākire kākītimoni, takariki nitakini atokokana. Eereka Aporo oerekari ninoa kākiti apikomoni Teoso sākire. Āparaā takari nireēkiti atoko itxa apikomoni Teoso sākire isāpiretakiti. Nota, Aporo pakini parīkauata ikara atoko,

iuaritika Teosonoka aneēkakari takari. Iuanokara txīkitakari kākiti auikiniri isākire. <sup>7</sup> Takariki taākari, āparaā siākari pakini minakati ninoa, kotxi Teosonoka aneēkakari takari. <sup>8</sup> Teoso sākire merepanika sāpiretakari nirekari iparīkauatini Teoso ĩkapani. Teoso sākire apikomoni sāpiretakari apaka nirekari iparīkauatini Teoso ĩkapani. Ininiā Teoso sikariko ninoa parīka ĩki ninoamoni iparīkana iaōka. <sup>9</sup> Teosokata parīkauatakani atxaua. Teoso kikiote atoko hītxaua. Apaka Teoso aapoko atoko hītxaua.

<sup>10</sup> Teoso sikapekano ikinipoko erekari niparīka iua ĩkapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini ĩkapani. Iua aapokotxi kamakari kimaroreri atoko nitxaua. Merepanika nota parīkauata Kristo sākire nisāpiretini. Kaikori aapokotxi kamakari takakiti atoko itxa ikara iua sākire. Eereka apanakini oerekarauata apikomoni. Ninoa parīka aapokotxi kamiko kaikori nopini atokokana itxa. Erepaniko akamakasaakiri ikara parīkatxi. <sup>11</sup> Kaikori, aapokotxi kamakari takakiti atoko itxa Xesosi Kristo sākire. Āti kaikori kākiti sākire !auari. Auape kaikori Xesosi Kristo sākire, kotxi kataparari. <sup>12</sup> Xesosi Kristo sākire aāuikasaaki, kaikori aāuini ĩkapani iposope. Aapokotxi iua kaikori nopini atoko itxa aparīka. Aparīka atxiīti oro atoko itxa. Atxiīti pirata atoko itxa. Atxiīti kai erekari atoko itxa. Atxiīti aamina atoko itxa. Atxiīti aātsopa atoko itxa. Atxiīti katsotati atoko itxa aparīka.

<sup>13</sup> Itixi xipokini ōti kākiti imarotariko natokopa itxa iparīka, kotxi iusaakiko arikatxi ataerekatari



iparīka. <sup>14</sup> Iparīka marikakaniā, apakapari iparīka īki. <sup>15</sup> Iparīka arikiniā, !apakapari iparīka īki. Iuaritika Teoso auiritari iua auini ātipirika Teosokata, txamari iua xipokaarita.

<sup>16</sup> Kona hīte imarotapanikari Teoso misākiretiko aikoti hininiua? Kona hīte imarotapanikari Erekarī Matamatakoti auini hīto āki? <sup>17</sup> Kākiti xipokiniāri Teoso misākiretiko aikoti, Teoso xipokariko iua. Teoso misākiretiko aikoti iua nakiti. Hītera Teoso misākiretiko aikoti hītxaua.

<sup>18</sup> Kona hīteka misirienetapeuako. Atxiīti ātikaka kākiti hīte sauāki uākatari kimaroreni ininiua, kotxi imarotarina īkorapokoriti auakani imarore. Īkorapokoriti auakani uākatari Kristo sākire auīākari mīikiteti ininiua. Ininiā erekape kākiti īkorapokoriti auakani akiritinii mīikiteti hininiua, kotxi iuasaaki kimaroreri atāo inakari hītxaua. <sup>19</sup> Teosomoni ! kiīkiteri īkorapokoriti auakani imarore. Teoso sākire iōkatsopatakori txari:

Teoso maīkari kimarorerini īkorapokoriti auakani ninoaka imaroreē.

<sup>20</sup> Apaka Teoso sākire iōkatsopatakori txari:

Apiananiri imarotari īkorapokoriti kimarorerini imarore !itxapō.

<sup>21</sup> Ininiā !apakata kākiti iuikiniua imarore xika. Ikinika aua hītemoni. <sup>22</sup> Paoro aua hītemoni, Aporo aua hītemoni. Petro aua hītemoni. Itixi aua hītemoni. Hāuini, hīpinini apaka aua hītemoni. Uatxa auakari, katana auakari apaka aua hītemoni. Ikinipoko aua hītemoni. <sup>23</sup> Kotxi hīte Kristo nakiti hītxaua. Kristo, Teoso nakiti itxaua.

## 4

*Kristo Iokanatakini Kākitimoni*

<sup>1</sup> Erekarī kākiti imarotini auītetxiakori aminakaniua. Kristo nitiriakori atxaua. Teoso iokanapirena nīkatakani atxaua. Iua sikari iokanapirena atemoni apanakini asāpiretini īkapani. Iua Teoso iokanapirena ! imarotaāka mitxi. <sup>2</sup> Nitiritxi atāo inakarī ātipirika kamari iauīte paniātakiti. <sup>3</sup> ! Nimaākatari hīte ataerekatinino nota. ! Nimaākatari apanakini ataerekatinino apaka. Kona notaka ataerekataua apaka. <sup>4</sup> Nākixinireē maerekati ! auari, iuaritika nīkamapekari maerekati. Apiananirinokara ataerekatano. <sup>5</sup> Ininiā ! hīsāpiretapiri: “Kona erekari iua parīka. Peerekari ikara parīka,” kona hītxape Apiananiri apokini apisa. Apiananiri apokini hiātapako. Iua oerekariko ipiāmoni iomaātakori. Oerekariko kākiti nirekakiti ākixinireēna iparīkauatakasaakina. Iuasaaki Teoso txariko kākiti: “Erekapitikari pikamakiti,” itxa.

<sup>6</sup> Nitariakori, ikara nota pirena, Aporo pirena pakini nisāpiretai atāo inakarī himarotini īkapani, āti apiata himiuiakani īkapani. Ininiā hīkamariko Teoso sākire iōkatsopatakori iaōka, kotxi ! apakata kākiti iteene iuikiniri āti, ātipekana imanirekakani inini. <sup>7</sup> Pite apiananitakari ! auari. Himapakapakiniti ! auari. Kapakapare hininiā, kinirepa mapakapareni sākirauatini atoko hītxa? <sup>8</sup> Ikinipoko hinireēkiti auapeka hītemoni atxiīti? Katiipekai hīte. Ate ereē mauakanisaaki, atxiīti hīteka kamari auītetxi hininiua. Ninirekari auītetxi atāo hininiua, ininiā ate auītetxi atxaua hītekata. <sup>9</sup> Īkorsaaki

neenamatzī xipoka atoko, auītetxi kāiatakari kanapiriā isotatonekata. Ninoa mapotōkire kākiti auītetxi maīkakini minaāka apanakini atamatinina īkapani, inapetinina īkapani. Eereka okaākana ninoa kākiti. Nota xinikari Teoso nirekari ate iua iokanatakini ikara kākiti maīkakoni atoko aniniua. Ikinimane atamataua. Kākiti, Teoso nitiriakori iaxitikini apaka atamataua apininimoni asini.

<sup>10</sup> Hītemoni, miīkiteni ate txaua, Kristo īkapani aparīkauatakasaaki. Hītemoni, kimarorei hīte, Kristo īkapani hīparīkauatakasaaki. Hītemoni, ! kaposotiireua ate. Hītemoni kaposotiirei hīte. Hīte paxitaāka, txamari ate omanataāka.

<sup>11</sup> Uatxapiima Kristo sākire ate auikini xika anatxita. Aposonata. !Kamākaua. Amisiritaāka. !Kaapokoua.

<sup>12</sup> Iteene aparīkauata anireēkiti aamotini īkapani. Kākiti takasaakiri maerekati atemoni, ate amanaāri Teoso erekari ninoamoni itakini īkapani. Amisiritikosaaki, iusaaki amīteenekari. <sup>13</sup> Apanakini misākirepiretakasaakiaua, erekari ate apakapapiretana ninoa. Uatxapiima apanakinimoni īkorapokoriti txiko atoko atxaua. Kasakari atoko atxaua ninoamoni.

<sup>14</sup> Kona niōkatsopata ikara hīpētauatini īkapani. Niōkatsopata ikara nipinitinii īkapani monōkori apokini apisa, kotxi namariteni nota tirketakini atoko hītxaua. <sup>15</sup> Hītemoni tesi mio Teoso sākire oereēkani auaākamako, iuaritika poiāo hīri atoko inakari aua. Notara hīri atoko nitxapekaua, kotxi hāuikari Teoso iokanapirena erekari noerekasaakii Kristo Xesosi posotiireē. <sup>16</sup> Ininiā nōtākikai: Nota kamakiti atokotxikana hīkamako.

<sup>17</sup> Ikara īkapani niokanatarī Tximótxio hītemoni. Iua namarite nitiretakiti atoko. Iua kamari

Apiananiri paniātakiti iaōka. Iua txīkitakai hīxinikiniri nikamakiti ikiniōtika Kristo posotiireē. Ikini tōpati Kristo sākire auiākani apotiitiniātaāua, noerekari kākiti erekari ikamini ikiniōtika, erekari nota kamini atokotxikana.

<sup>18</sup> Ātikaka hīte iuikaua, kotxi hīuākatari nota mapokakani hītemoni. <sup>19</sup> Txamari Teoso auri-tiniāno, paītiki napokako hītemoni. Iuasaakiko ! ninirekari nimarotiniri ninoa iuikakaniuā sākire. Napokasaaki ereē, ninirekari nimarotiniri Teoso posotiire. <sup>20</sup> Teoso auītetxi ininiātaāua kona sākiretxinani aua. Iposotiire apaka aua. <sup>21</sup> Kiripa hīte nireka? Hinirekatari ninoropatinii aīkeē, ereē napokasaaki? Hinirekatari nitiretinii, nimatxitananii, ereē napokasaaki?

## 5

### *Maerekati Xesosi Sākire Auiākani Sauaki*

<sup>1</sup> Isāpiretaāka kākiti ereē kaminiri maerekati ītotxi nireēkiti āti kākitikata. Iua kākiti maerekani apiari, kotxi iua sirīka iri ītanorokata. Teoso sākire mauīākani kamari maerekati, iuaritika ninoa ! ikamari ikara atoko inakari maerekati, kiki hīte sauaki auakari kamakiti atoko. Ninoa !inirekari isākiretinirina ikara atoko inakari maerekati. <sup>2</sup> Iuaritika hīte iuikaua. ! Himatinaniuata himaerekani xika. Apiaerekata īkora iri ītanorokata sirīkakari hīokanatinii itakanapinii. <sup>3</sup> Niīto kona ereē aua, iuaritika nixinikakiti auapitika ereē hītekata, ininiā nota ereē hītekata nauini atokokana, nimereēpekari iua maerekati kamakari misiritiko. <sup>4</sup> Aāuīte Xesosi Kristo uākaā hāpotiitakasaakiua, nota aua hītekata nixinikakitiā. Iuasaaki himarotakasaakiri Xesosi Kristo posotiire,

<sup>5</sup> hīsikariko iua Satanasimoni iua ĭto ipinini ĭkapani, ixinire ereka inini Xesosi kanapiriāksaaki.

<sup>6</sup> !Apakata hūikiniua. Himarotari axapiti pāo tireēkari tirekakari itori pāo. Iua atokokana ātika maerekati kamakari txīkitakari kaiāopokori kākiti kaminiri maerekati. <sup>7</sup> Ininiā hōkanapariko maerekati mitxi hīkamakiti, amaneri hinini ĭkapani. Ininiā pāo miātiākati atoko hītxaua, kotxi ikoke ! auari. Kitxakapirīka kākiti okari ipira soti auīte, ininiā Teoso nitiri napaāpotakasaaki ninoa nopini, kona okana ninoa. Kristo, apira soti auīte atoko itxa. Iua ipina ate mapinakani ĭkapani. <sup>8</sup> Páskoa kiiniritisaaki, Teoso ! auiritari pāo ātikakari nikiko, kotxi maerekati pāo tirekakari atoko itxa. Ininiā maōkanapari maerekati mitxi akamakiti. Pāo miātiākati atoko matxaua, ininiā makamari erekari. Masākiretari atāo inakaranoka. <sup>9</sup> Niokanatsopatapeka hītemoni himapotiitakaniua maerekati kamakanikata, ĭtotxi nireēkiti kamakanikata. <sup>10</sup> Na nixinikari ĭkorapokoriti maerekati kamakani. Maerekati ĭtotxi nireēkiti kamakani, kamanarerini, kamisirienererini, kamakori teosonetakani pakini ĭkorapokoriti auakani na nixinikanāta. ! Hīposota hītakanapinina ninoa, kotxi auapikana. Hīpīksaakinokara, hītakanapana ninoa. <sup>11</sup> Uatxa niokanatsopata hītemoni, himapotiitakaniua maerekati kamakanikata, “Xesosi sākire auiākarirano” inakanikata. ĭtanoro minakotokatika sirīkakani, kamanarerini, kamakori teosonetakani, āti misākirepiretakani, ipoātakani, kamisirienereri pakini hītakanapako. Kona hinipokotape ikara atoko inakanikata.

<sup>12</sup> Kona nota parīkani Xesosi sākire mauiākani misiritiko nisāpiretini. Hīte parīkakara Xesosi sākire auiākani misiritiko hīsāpiretini. <sup>13</sup> Teosokara sāpiretariko Xesosi sākire mauiākani misiritiko. Hīte iokanatariko maerekati kamakari hīte sauaki auakari isini.

## 6

### *Āti Naiatakasaakiri Āti*

<sup>1</sup> Xesosi sākire auiākari naiatiniāri āti Xesosi sākire auiākari, !apakata Xesosi sākire mauiākani apisatoō anikiko. Hanikana ninoa Xesosi sākire auiākanimoni maerekati kamakari misiritiko himarotini ĩkapani. <sup>2</sup> Kona himarotapanikari Xesosi sākire auiākani mereēriko Xesosi sākire mauiākani misiritiko āti ōti? Hīkamariko ikara atoko inakari xipokatxi ōtisaaki, ininiā hīposotapitikari uatxa himereiniri kākiti misiritiko, āti naiatakasaakiri āti. <sup>3</sup> Atxiīti hīte kona imarotapanikari himereiniri Satanasi nitiriakori misiritiko āti ōti? Ininiā hīposotapitikari himereiniri kākiti misiritiko ĩkorapokoriti uatxa. <sup>4</sup> Txamari neenamtxi hīte sauaki auiniā, hanikatari kākiti Teoso sākire auiākani mapaxitakanimoni? !Apakata, kotxi ninoa ! imarotari Teoso paniātakiti. <sup>5</sup> Ikara atoko nitxai nikamapētatinii ĩkapani. Atxiīti kona hīposotatari hāpokiniri kimaroreri hīte sauaki neenamtxi xipokini ĩkapani? Atxiīti kona ātika aua? <sup>6</sup> Txamari āti Xesosi sākire auiākari anikari āti Xesosi sākire auiākari Xesosi sākire mauiākani apisatoō maerekati kamakari misiritiko himarotini ĩkapani. Ikara atoko !apakata.

<sup>7</sup> Ininiã iteene hīkerokari, kotxi hanikari hītari kākiti misiritiko mereēkarimoni. Erecape hāuiritiniri hītari kaminiri maerekati hītemoni. Erecape hāuiritiniri hītari itirīkiniri hītii. <sup>8</sup> Txamari hītiriuata. Hīkamari maerekati. Hītariakorimonira hīkamari ikara. !Apakata. <sup>9</sup> Kona himarotapanikari atāo minakatī kamakani ! isari Teoso auītetxi ininiātaāua? Kona hīteka himisirienetapeua. Ia atoko inakari kākiti ! isari Teoso auītetxi ininiātaāua: maerekati itotxi nireēkiti kamakani, kamakori teosonetakani, itanoro minakotokatika sirīkakari, kiki sito ininiua nirekakari, kiki āti kikikata sirīkakari. Ninoa ! isari Teoso auītetxi ininiātaāua. <sup>10</sup> Kiītiririni, kamanarerini, poātakani, āti misākipireretakani, kamisirienererini pakini ! isari Teoso auītetxi ininiātaāua. <sup>11</sup> Ikara atoko mitxi hītxaua hīte apanakini. Iuaritika himaerekani makatxakaākapeka. Teoso kamai hīte inakitiakori hinini. Apiananiri Xesosi kamaerekatai. Erekarī Matamatakoti, aTeosone nakiti, iua apaka txīkitakai hīte atāo inakari kamakani hininiua.

### *Maerekati Itotxi Nireēkiti*

<sup>12</sup> Nota posotari ikinipoko nikamini, txamari kona erekari ikinipoko nikamini. Nota posotari ikinipoko nikamini, txamari kona ninirekari nikamakiti niauīte ininiua. <sup>13</sup> Nipokori kamaāka tikakotxi ikapani. Tikakotxi nirekari nipokori. Txamari Teoso xipokariko nipokori, tikakotxi pakini. Teoso ! inirekari akaminiri maerekati aīto nireēkiti āti kākiti itokata. Apiananiri kamari aīto iua nireēkiti akamini ikapani. Aīto Apiananiri nakiti.

14 Teoso ōkitikari Apiananiri ipīkani sauaki. Iua atokokana iua ōkitikaua ate iposotiireē.

15 Ininiā ! apakata Kristo īto hīsikini sito kanokareromoni. ! Apakata. 16 Kiki sirīkasaaki kanokarerokata, iuasaaki ātinoka ītotxi atoko itxauana ninoa. Teoso sākire iōkatsopatakori sāpiretaua:

Kiki sirīkini sitokata, ātika ītotxi atoko itxauana.

17 Kākiti moianatakasaakiri Apiananiri, ātika xiniretxi atoko itxauana ninoa xinire.

18 Ātokata hīsirīkini hinirekasaaki, himitekako. Kona hīkaikotape iuaā. Apanakini maerekati kākiti kamakiti ! imisiritari hīto. Imisiritari hākixinire. Hīkamakasaakiri maerekati hīto nireēkiti sitokata, himisiritari hīto, hākixinire pakini. 19 Kona himarotapanikari hīto Erekarī Matamatakoti misākiretiko aikoti atoko ininiua? Hīte ītoākarari iua. Teoso sikari iua hītemoni, ininiā hīto kona hīte nakiti. 20 Teoso iamotapekai hīte Xesosi ipīkasaaki, ininiā hīto īki auapitika. Ininiā uatxa iua nakiti hītxaua. Ininiā uatxa hītoā hīpaxitariko Teoso.

## 7

### *Ītanorouatiko Sākiretxiti*

1 Uatxa napakapapiretariko mitxi hiōkatsopatakiti notamoni. ! Erekarī kiki kaxirotiniro sito. 2 Txamari inirekasaakiri sitokata isirīkini, erekarī kiki auini iuaka ītanorokata. Erekarī sito auini oaka ōtanirikata. 3 Ininiā erekarī kiki sikiniri īto ītanoromoni. Erekarī sito sikiniri oīto oītanirimoni. 4 Ītanorotxi īto kona oa nakitinanini. Ōtaniri nakiti apaka oīto. Apaka ītaniritxi īto kona iua nakitinanini. Ītanoro nakiti apaka iīto. 5 Kona hītxape: “Kona



ninirekari nisirīkini pitekata,” kona hītxape. Hinirekasaakiri nipokori himanikakani Teoso himisākiretini ĩkapani, atxiīti iuasaaki !hinirekari hīsirīkini hītanorokata. Hītanoro apaka kona nirekari osirīkini hītekata iuasaaki, Teosonoka hīxinikini ĩkapani. Ininiā ikara atoko hīkaminiā erekari, txamari paītiki eereka iuaīkana hīsirīkako hītanorokata. Ininiā ikara atoko Satanasi kona sikanireōtai maerekati hīto nireēkiti hīkamini āto sitokata hīsirīkini. <sup>6</sup> Ikara nota otākikai hīte. Kona nīpaniātai ikara hīkamini. <sup>7</sup> Notamoni erekari nota atoko hinini. Iuaritika ikinimane aua Teoso siākiti iparīka kamini ĩkapani. Teoso sikari āti isikakiti ātimoni. Ātiāo isikakiti isika ātimoni.

<sup>8</sup> Uatxa nimisākiretanako mītanirini, mītanoroni, tikinitakoni pakini. Erekari himītaniriuatakani, himītanorouatakani nota atoko hinini. <sup>9</sup> Txamari himaposotakaniāri hītakanapiniri hīto nireēkiti, erekari hītanorouatini, erekari hītaniriuatini, kotxi kapatakari atoko itxa hīto nireēkiti.

### *Hīkamari Atāo Hītaniriuatakasaaki*

<sup>10</sup> Ia nīpaniātana kākiti ĩtaniriuatakani: !Apakata sito takanapiniri oītaniri. Kona notani paniātai. Apiananirira paniātai. <sup>11</sup> Otakanapiniāri oītaniri, ! apakata iuaīkana oītaniriuatini. Erekari oītanirimoni iuaīkana okanapiriini. Iua atokotxikana !apakata kiki takanapiniro ĩtanoro. <sup>12</sup> Nōtākikari apanakini. Apiananiri paniātakiti apanakini ĩkapani ! auari, ininiā nota otākikana ninoa ia atoko: Xesosi sākire auīākari auiniā ĩtanoro Xesosi sākire mauīākato, oa nirekiniāri okaikotini iuakata, ! apakata iua iokanatiniro oa otakanapiniri iua. <sup>13</sup> Iua atokotxikana, Xesosi sākire auīākaro auiniā oītaniri Xesosi sākire mauīākati, iua nirekiniāri ikaikotini

oakata, !apakata otakanapiniri iua. <sup>14</sup> Iuasaaki ĭtaniritxi Xesosi sākire mauĭākati apakapari Teoso sākire ĭtanoro kamakiti ereka atamatakasaaki. Iua atokotxikana, ĭtanorotxi Xesosi sākire mauĭākato apakapari Teoso sākire ōtaniri kamakiti ereka oātamatakasaaki. Imakamakaniārĭna ikara atoko, !erekana imiakori. Irĭtxi, inorotxi pakini kaminiārĭ nōtākikakiti iaōka, erekana imiakori. <sup>15</sup> Xesosi sākire mauĭākati nirekiniārĭ itakanapiniri ĭtanoro, oa auiritariko isini. Xesosi sākire mauĭākato nirekiniārĭ otakanapiniri oĭtaniri, iua auiritaroko osini. Ikara atoko ininiā, ninoa sikakapeēkaika. Ikara atoko ininiā erekari, kotxi Teoso !inirekari aneenamauatini ikara xika. <sup>16</sup> Pite ĭtanorotxi, pimarotatari? Atxiĭti pĭtaniri auikari Xesosi sākire imaerekani makatxakiko ĭkapani, Xesosi sākire pisāpiretakasaakiri iua. Pite ĭtaniritxi, pimarotatari? Atxiĭti pĭtanoro auikari Xesosi sākire omaerekani makatxakiko, Xesosi sākire pisāpiretakasaakiro oa.

### *Teoso Akiritakasaakiri Kākiti*

<sup>17</sup> Ininiā ikininape kamariko iparĭka Teoso sikakiti iuamoni, kotxi Apiananiri akiritaua ikara parĭkatxi akamini. Ikara nipaniātari ikinimane Teoso mereēkini apotiitiniātaāua. <sup>18</sup> Teoso akiritakasaakiri kiki, Teoso takaōtxikare ĭĭtoā auiniā, !apakata Teoso takaōtxikare makatxakiko. Teoso akiritakasaakiri kiki, Teoso takaōtxikare ĭĭtoā mauakaniā, !apakata Teoso takaōtxikare ĭĭtoā takiko. <sup>19</sup> Teoso takaōtxikare hĭĭtoā auiniā, ikara kona txĭkitakai Teoso anaakori hininiua. Teoso takaōtxikare hĭĭtoā mauakaniā, ikara apaka kona txĭkitakai Teoso anaakori hininiua. Teoso nireēkiti iaōka kamiko txĭkitakai Teoso anaakori hininiua. <sup>20</sup> Teoso akiritakasaakii, iuasaaki mitxi hĭparĭka

hīkamapanikako. <sup>21</sup> Teoso akiritakasaakii, nitiritxi amotakori hininiãua, ininiã kona maerekaxinireti hītxapeua nitiritxi hininiua xika. Iuaritika hīauīte sikakiniãi, ininiã hīsako. <sup>22</sup> Apiananiri akiritiniãri nitiritxi amotakori, Apiananiri sikakakiti itxaua iua. Apiananiri akiritiniãri nitiritxi minakatiua, Apiananiri nitiri iamotakiti itxaua iua. <sup>23</sup> Xesosi amotakini hītxaua, ininiã iuaīkana kākiti nitiri iamotakoni ! hītxapeuako. <sup>24</sup> Nitariakori, Teoso akiritakasaakii, iusaaki mitxi hīparīka hīkamapanikako.

### *Mitxitakani, Tikinitakoni Pakini*

<sup>25</sup> Uatxa nōtākikai hīte mitxitakani. Apiananiri kona sãpiretano ipaniãtakiti hīte ĩkapani, iuaritika nisãpiretai nixinikakiti, kotxi Apiananiri amonīkapekano, ininiã kākiti posota auikiniri nisãkire. <sup>26</sup> Īkorasaaki pamonōkoniri Xesosi sãkire auiañkanimoni, ininiã notamoni apiaerekata kākiti mītanorouatakani. <sup>27</sup> Hītanorouatapeka hininiã, kona hītakanapapero hītanoro. Mītanorouatakatipanika hininiã, kona hinitapero hītanoro. <sup>28</sup> Iuaritika hītanorouatiniã, maerekati ! hīkama. Kākiti ĩtanorouatiniã, apokapitikako ninoa maxikiko. Kona ninirekari ĩkara atoko hīte ĩkapani.

<sup>29</sup> Nitariakori, poião õtinoka aua aparīkauatini Apiananiri ĩkapani. Ininiã hīte kītanororini parīkauatako Teoso ĩkapani mītanoroni parīkauatini atokotxikana. <sup>30</sup> Txiapatakari parīkauatako Teoso ĩkapani, kākiti matxiapatakati parīkauatini atokokana. Poxokori parīkauatako mapoxokoniti parīkauatini atokokana. Tītxi amotakari parīkauatako Teoso ĩkapani, tītxi mauakiniti

parīkauatini atokokana. <sup>31</sup> Īkorapokoriti tiitxi auakini ! ixinikapiriko itiina, kotxi ĩkorapokoriti kākiti potxitakiti xipokaāpota.

<sup>32</sup> Ninirekari erekaxinire hinini. Kiki mītanoroti posotari ixinikiniri kanatokopa iparīkauatini Apiananiri ikamapoxokonitini ĩkapani. <sup>33</sup> Txamari kiki kītanorori xinikari parīkatxi ĩkorapokoritikiri, kotxi inirekari ikamapoxokonitiniro ĩtanoro.

<sup>34</sup> Mītanirito, mitxitakaro pakini nirekari oparīkauatini Apiananiri ĩkapani, kotxi onirekari oīto, oxinire pakini osikini iuamoni. Txamari sito kītaniriro xinikari parīkatxi ĩkorapokoriti auakari, kotxi onirekari oītaniri okamapoxokonitini.

<sup>35</sup> Ikara atoko nisāpiretai hīte, hīte ereka hinini ĩkapani. Kona ninirekari nimauiritakanii erekari hāpakapini. Ninirekari atāonoka hīkamini. Ninirekari hīparīkauatini Apiananirinoka ĩkapani.

<sup>36</sup> Ātokoro iri atxiīti ! auiritapanikaro oa ĩtaniriuatini, txamari oaneēpeka. Ātokori nirekiniāri itakiniro oa, erekari iua auiritiniri iua. ! Ikamari maerekati. Erekari iua auiritinina ninoā ĩtaniriuatini. <sup>37</sup> Atxiīti ātokoro iri ākixinireē ! inirekaro oa ĩtaniriuatini. Atxiīti ! isikaenetaro oa ātimoni. Iua xinikakiti omītaniriuatakani ĩkapani pataparari ininiā, ākixinireē imarotiniāri inireēkiti oa mītaniriuatakani, ininiā iua kiki kamari erekari. <sup>38</sup> Oa sikakari oītaniriuatini ĩkapani kamari erekari. Iuaritika oa masikakati oītaniriuatini ĩkapani kamari apiaerekata.

<sup>39</sup> Teoso paniātakiti iōkatsopatakori paniātaro sito kaikotini oītanirikata iua auapanika inakasaaki. Iua ipininiā, apakata oītaniriuatini onirekakitikata. Txamari Apiananiri sākire auiākarikatanoka

apakata oītaniriuatini. <sup>40</sup> Notamoni oa apia poxokoniyata omītaniriuatakaniā iuaīkana. Ikara atoko inakari nōtākikaro sito, kotxi nimarotari Erekari Matamatakoti Teoso nakiti aua notamoni.

## 8

### *Nipokori Teoso Kamakori Sikiko*

<sup>1</sup> Uatxa nisāpiretai nipokori sikiko teoso kākiti kamakitimoni. Amakinika aimarotari ikara. Ikara inakari aimarotapeka ate. Kākiti imaroretxi auiniā iuikaua. Apiaerekata kākiti auini tiraōkitxi, kotxi isikataparitari kākiti xinire. <sup>2</sup> “Kimaroreno nota” inakari ! auari imaroretxi. Kaiāopokori imaroretxi imimarotakiniti aua. <sup>3</sup> Iuaritika kākiti turetiniāri Teoso, Teoso imarotari iua.

<sup>4</sup> Maxinikari nipokori teoso kamakorimoni sikakori. Aimarotari teoso kākiti kamakiti ! kakamareri. Aimarotari ātika Teoso atāo inakari aua. <sup>5</sup> Aua kākiti kamakiti. Kākiti takauākatari “teoso” itxaua. Kākiti takauākatari teoso iaxiti auakani, ikorapokoriti auakani apaka. Kaiāopokori ikara atoko inakari teosoakori aua. Kaiāopokori ikara atoko inakari auītetxiakori aua. <sup>6</sup> Atemoni ātika Teoso aua. Iua aīri iaxitikiri. Iua kamari ikinipoko. Aparīkauata iuanoka ikapani. Ātika aāuīte aua, Xesosi Kristo. Ikini sereti kamakari iua. Iua posotiireē aūini aua.

<sup>7</sup> Apanakini ! imarotapanikari kākiti kamakiti teoso minakanua, kotxi mitxi iteene itotarina teoso kākiti kamakiti. Ininiā inikasaakirina nipokori teoso kamakorimoni siākori, iuākatarina ikara nipokori teoso atāo inakarimoni siākori. Iuasaaki ninoa uākatari maerekati ikaminina, kotxi ākixinireēna liteene imarotarina atāo inakari. <sup>8</sup> Txamari nipokori !itxīkitakaua Teosomoni asini.

Ikara nipokori anikini !imisiritaua. Apaka !ikamari ereka anini.

<sup>9</sup> Iuaritika erepaniko. Hinirekiniāri ikara nipokori hinikini, hīxinikariko apanakini Teoso sākire poiāonoka auiākani. Ninoa imarotiniāri hīte nikiniri ikara nipokori, ininiā ninoa apaka nikari, txamari iuasaaki ninoa kamari ākixinirena manirekakiniti. <sup>10</sup> Teoso sākire poiāonoka auiākari atamatiniāi Teoso sākire iteene imarotakari nikiniri nipokori teoso kamakori misākiretiko aikotiā, isikataparaxiniretari iua apaka nikiniri nipokori teoso kamakorimoni siākori. <sup>11</sup> Ininiā pimarore xika, atxiīti pitari Teoso sākire poiāonoka auiākari sari imisiritikomoni. Kristo ipina iua īkapani apaka. <sup>12</sup> Ikara maerekati hītarimoni hīkaminiā, hīkarotari ākixinire. Hītari ākixinire hīkarotakasaaki, hīkamari maerekati Kristomoni. <sup>13</sup> Ininiā nipokori ninikini txīkitakiniāri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

## 9

### *Teoso Iokanatakini Kākitimoni*

<sup>1</sup> Teoso iokanatakiti nitxaua. Ninireēkiti niposota nikamini. Naōkitapekari Xesosi Kristo aāuīte. Iparīka nikamakasaaki, hīte auikari Apiananiri sākire. <sup>2</sup> Atxiīti apanakini !auikari Teoso iokanatakiti nininiua. Hītera auikari Teoso iokanatakiti nininiua. Hītera oerekari Apiananiri iokanatakiti nininiua, kotxi hīte auikari Apiananiri sākire, nota sāpiretakasaakii hīte.

<sup>3</sup> Kākiti mauikakaniāri Teoso iokanatakiti nininiua, napakapapiretana ninoa ia atoko:  
<sup>4</sup> Apakata atxiīti aāpakapiniri nipokori, iāriā pakini aparīkauatini īkapani? <sup>5</sup> Apakata atxiīti ate anikiniro ātanoro Teoso sākire auiākaro atekata, apanakini Teoso iokanatakini, Apiananiri itariakori, Petro pakini anikinina ninoa ītanoro atokotxikana? <sup>6</sup> Atxiīti apakata Panapee, nota pakininoka parīkauatini anikakiti aāpakapini īkapani?

<sup>7</sup> Sotato sikasaaki ineenamauatini īkapani, iuaka !iamotari anikakitina. Aua atxiīti ova takakari. Ova itakakiti matximakati aua? !Auari. Kona auari kema auīte piratakari ipira tiniā miātakati.

<sup>8</sup> Ikara nisākire kona kākiti sākirenanini, Iua atokotxikana Teoso sākire. <sup>9</sup> Moisesi iōkatsopatapekari Teoso paniātakiti. Ia atoko itxa: Kona hiītxikari kema auīte nama trikopani ikamakasaaki. Hāuiritariko inikini.

Teoso turetataro kema auīte? Itiretapitikari.

<sup>10</sup> Apiata isāpiretari ikara kākiti parīkauatakani īkapani. Ininiā takarauatakari takarauata, kotxi inirekari ikiena inikini. Kienatxi apakari apari ikiena, kotxi inirekari ikiena inikini.

<sup>11</sup> Katarakeri takarauatini atokokana, ate takari Teoso sākire hākixinireē. Katarakeri nikari ikiena itakakiti, ininiā atxiīti apakata ate apakapiniri kienatxi hīte sikakiti? Kotxi ate parīkauata hīte īkapani.

<sup>12</sup> Apakatiniā apanakini apakapiniri iparīkana īki hīte sikakiti, ininiā apiata apakata ate apakapiniri ate parīka īki, iuaritika kona aamanaāri hīsikiniāua ate parīka īki. Amīteenekari ikinipoko, kotxi !anirekari aiotokakiniri Kristo iokanapirena erekari hīkenakotini. <sup>13</sup> Himarotari

Teoso misãkiretiko aikoti ãki parĩkauatakani iuaãtaã apakapari ikiena. Teosomoni sikakori takikoãtaã parĩkauatakani apaka apakapari ipixini iuaãtaã siãkori inikinina ĩkapani. <sup>14</sup> Iua atokotxikana Apiananiri paniãtari iua iokanapirena erekari sãpiretakani apaka apakapiniri iparĩkana ĩki.

<sup>15</sup> Ikara atãopitikara, iuaritika kona nipaniãtai ikara atoko hĩkamini. Kona niõkatsopatarari ikara, niparĩka ĩki notamoni hĩsikini ĩkapani. Niparĩka ĩki namanainii apisa erekape nipinini. Niuikari niparĩkauatini hĩte ĩkapani hĩtxineirote nimapakapakanisaaki. <sup>16</sup> Teoso iokanapirena erekari noereka, iuaritika ! apakata niuikiniua, kotxi Teoso sikari ia parĩkatxi notamoni. Nimisiritiko auapitika, Teoso iokanapirena erekari nimasãpiretakaniã. <sup>17</sup> Teoso iokanapirena erekari nisãpiretiniãri kãkiti, nãkixinireẽ iteene ninirekiniãri ikara nikamini, ininiã napakapapitikariko niparĩka ĩki. Nimanirekakaniãri ikara nikamini, iuaritika nikamari, kotxi Teoso sikari ikara parĩkatxi notamoni nikamini ĩkapani. <sup>18</sup> Ia atoko niĩkitxitiko: Teoso iokanapirena erekari nisãpiretakasaaki, kona minakati napakapa. Ikara atoko kamapoxokonitari nãkixinire, kotxi maĩkitika nisãpiretai Teoso sãkire. Teoso iokanapirena erekari sãpiretakari nitxaua, ininiã niposotiire auapitika hiĩkitxitinino nota nipaniãtiniãri hĩte, iuaritika ! ninirekari ikara atoko nikamini nota nireẽkiti napakapini ĩkapani.

*Parĩkatxi Ikinimane ĩkapani*



19 Ninireēkiti nikama. Kākiti nitiri iamotakori ! nitxaua. Iuaritika notaka nitxīkitakaua ikinimane nitiri nininiua, Teoso sākire apikomoni kākiti auikini ĩkapani. 20 Xoteoakori sauaki niparīkauatakasaaki, Xoteo auini atoko nitxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, ninoa auini atokokana nitxa nota auini, kotxi ninirekari Moisesi sākire auiākani auikiniri Xesosi sākire. 21 Xoteo minakanuia ! imarotari Moisesi paniātakiti. Ininiā ninoakata nauakasaaki, kona nipaniātari Moisesi paniātakiti ikaminina, Xesosi sākire auikinina ĩkapani. Iuaritika nikamari Teoso paniātakiti, kotxi iuatxikana Kristo paniātakiti nikamini. 22 Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina ĩkapani. Ikini kākiti sauaki nauakasaaki, nikamari kākiti auini atoko nitxa nota auini, ininiā ikinipoko niposotakiti nikama apanakini maerekani makatxakiko ĩkapani. 23 Ikara atoko nikama Teoso iokanapirena erekari nisāpiretini ĩkapani. Nikamari ikinipoko, Teoso iokanapirena erekari nisāpiretini ĩkapani. Ikara atoko ininiā, nota apaka apakapari Teoso iokanapirena erekari hītekata.

### *Saporiēta Apakapakari*

24 Himarotari mitekaxi. Kākiti miteēkani miteka, iuaritika ātinoka apakapari imitekini ĩki. Merepitipanika mitekaxi mapotōkire apokakarinnoka apakapari imitekini ĩki. Ininiā miteēkari atoko hītxako. Hīsapitipo. Teoso parīka hīkamapitipo hīparīka ĩki hāpakapini ĩkapani. 25 Ikini miteēkari parīkauatapitipo iito tapara

iteene auini ĩkapani. !Auiritari iĭto misiritakari. Ikara atoko ikama, saporieĭta imitekini ĩki apakapini ĩkapani. Ikara saporieĭta kona okanani aua. Oxipokapitikako. Ate parĭkauatapitipo aĭtiāo aāpakapakiti aāpakapini ĩkapani. Ikara aāpakapakiti !ixipoka. <sup>26</sup> Miteēkari isinimoni mĭmarotakati atoko !nitxaua. Nimarotari nisinimoni. Nisapitipo mitekaxi mapotōkiremoni. Maxikatiĭka !nineenamauata. Na neenamauata nisanōkakata. <sup>27</sup> Nitxĭkitakari niĭto ninitiri ininiuā, nota nireēkiti ikamini ĩkapani, kotxi nisāpiretapekari ikara apanakinimoni, ininiākara kona ninirekari nimapakapaniri notaka parĭka ĩki.

## 10

### *Kākiti Isaeokini Aōerekini Pirena*

<sup>1</sup> Nota nirekari hĭxinikiniri kitxakapirĭka, aātokiriakorini takanapakasaakiri Exito tixini, ikinika ninoa aua katxiāri patapi. Iua katxiāri oerekana isinimonina. Apaka ikinika ninoa napari potxoari uiniti āki. <sup>2</sup> Ninoa sari Moisesikata, ininiā katxiāri patapi auakasaakina, potxoari uiniti patapi auakasaakina, iusaaki ninoa patxisatiko atoko aua iusaaki. <sup>3</sup> Ninoa ikinikana nikari xinitxi Teoso iokanatakiti. <sup>4</sup> Ninoa ikinikana iātari āparaā Teoso sikakiti. Ninoa iātari āparaā kai auĭteākirĭā. Kristo iua kai auĭte āparaā potorikiniātaā atokokana. Iua sari ninoakata. <sup>5</sup> Txamari Teoso !apokaerekatari kaiāopokori ninoa, ininiā ipinana. Iĭtona iarika āparaā makipakaniātaā.

<sup>6</sup> Uatxa axinikana ninoa, ininiā aimarotari amanirekakaniri maerekati ninoa nirekiniri

atoko. <sup>7</sup> ! Hīteosonetapiri kākiti kamakiti, ninoa apanakini teosonetiniri atokokana, kotxi Teoso sākire iōkatsopatakori txari:

Ninoa topāka inipokotinina ĩkapani, iātinina ĩkapani, eereka ōkitikauana isarauatinina ĩkapani teoso ikamakitina apisatoō.

<sup>8</sup> ! Apakata aanokarauatini ninoa apanakini anokarauatini atoko, kotxi āti ōtinokara vītxi tres mio ninoa okaāka ĩkora maerekati xika.

<sup>9</sup> ! Apakata aātamakaerekatiniri Kristo ninoa apanakini kitxakapirīka atamakaerekatiniri atoko, kotxi iua xika imini okana ninoa. <sup>10</sup> ! Hītsoatape, ninoa apanakini kitxakapirīka tsoatini atokokana, kotxi eereka Teoso nitiri xipokana ninoa.

<sup>11</sup> Ikara imisiritikona apoka ninoamoni apanakini pinitiko ĩkapani. Ikara imisiritikona iōkatsopataāka ate pinitiko ĩkapani, kotxi itixi mapotōkire ōti apokaāpota. <sup>12</sup> Hītemoni ereka hinini, ininiā erepaniko, kotxi atxiīti paītiki hīkamari maerekati. <sup>13</sup> Hīte atamakaerekataāka ikinimane atamakaerekataāka atoktxikana. Iuaritika Teoso ! itakanapai hīte. Kona iua auiritari hātamakaerekatiko himamīteenekakiniti. Iuasaaki oerekai himitekini, ininiā hīposotari himīteenekiniri.

### *Teoso Kākiti Kamakiti*

<sup>14</sup> Ininiā nitariakori nota tīretakini, himiteka teoso kākiti kamakiti hītakanapini.

<sup>15</sup> Hīte kākiti kimarorerini, ininiā iteene himixinikariko nisākire. <sup>16</sup> Iāriā aātakasaaki,

akinika aāpotiitakasaakiua, axinikari Xesosi ipinini. Iuasaaki atxari Teoso: “Erekapitikai, kotxi Xesosi arēka xiketa ate ĩkapani.” Amaxiōpekitakasaakiri

komiri, anikasaakiri, aãpitiitakasaakiua, axinikari Kristo îto noropatiko ate îkapani. <sup>17</sup> Iuasaaki itomaneua ate, iuaritika âtika komiri atokokana atxaua. Âtika îtotxi atokokana atxaua, kotxi amakinika anikari âtika komiri. Ikara komiri Kristo îto atokokana itxaua.

<sup>18</sup> Hîxinikanako kãkiti Isaeokini îkorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakirina ikara xinitxi, iuasaaki ninoa oerekari iTeosonetinirina iua. <sup>19</sup> Kiripa ninireka nisãpiretinii? Nisãpiretari teoso kãkiti kamakiti kona kakamareri. Iua teoso siãkori kona itxa. <sup>20</sup> Iuaritika erepaniko. Ikara atão maerekati. Xoteo minakanuia sikakiti teoso kãkiti kamakitimoni ninoa sika Satanasi nitiriakorimoni. Kona Teoso atão inakari isikana isiãkitina. Ininiã na ninirekari hîte moianatiniri Satanasi nitiriakori. <sup>21</sup> Kona hîposotari Apiananiri iãkoanaã hiãtini, apaka Satanasi nitirini iãkoanaã hiãtini. Kona hîposotari Apiananiri kiena hinikini, apaka Satanasi nitirini kiena hinikini. <sup>22</sup> Atauako anirekatari akaminiri Teoso naiatiniua? Ate tapara apiata atxiîti?

### *Xesosi Auiãkani Kamakiti*

<sup>23</sup> Nota posotari ikinipoko ninireëkiti nikamini, txamari kona ikinika erekari nikamini. Ikinipoko ninireëkiti niposotapitika nikamini, txamari kona ikinipoko kamari nãkixinire aneini. <sup>24</sup> ! Hinitapiriko hîteka nireëkiti hãpakapini. Himoianatariko âti iua nireëkiti apakapini.

<sup>25</sup> Hîposotari hinikiniri nipokori amotakoriãtaã auakari. Iuasaaki kona hîpimaãpiri: “Ia nipokori sikaãkapeka teoso kãkiti kamakitimoni?” ! hîtxapeko. Kotxi himarotakasaakiri hinikiniri

nipokori teoso kākiti kamakitimoni sikiko, hākixinire karotaāka atxiīti. <sup>26</sup> Teoso sākire sāpiretaua:

Itixi Apiananiri nakiti itxaua, ikinika itixi auakani pakini.

<sup>27</sup> Xesosi mauīākani aiatakasaakii hīte hinipokotini ninoakata, hinirekiniāri hīsa. Hinikariko isikakitina. Kona hīpimaāpiri: “Ia nipokori teoso kākiti kamakiti sikaākapeka?” kona hītxape, hākixinire himakarotakaniri ĩkapani. <sup>28</sup> Txamari apanakini kākiti iuaā sāpiretakasaakii: “Ia nipokori sikaākapeka teoso kākiti kamakitimoni,” itxa. Iusaaki kona hinikapiri, kotxi atxiīti hīkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani pakini.

<sup>29</sup> Na nitxai: “Kona hinikapiri ikara, hīteka ākixinire himakarotakani ĩkapani,” ! nitxai. Nitxai: “! Hinikapiri ikara, āti kākiti ākixinire himakarotakani ĩkapani.” Nota ākixinireē nota nireēkiti nikamini ĩkapani erekari. Āti kākiti ākixinireē nota nirekakiti nikamini ĩkapani ! erekari, ininiā iuamoni ikara nikamakasaaki, nikamari maerekati. Kinirepa ! apakata nikaminiri nota ākixinire auiritakiti? <sup>30</sup> Napakapakasaakiri nipokori, ininiā iusaaki nimisākiretari Teoso erekari isikakiti. Ininiā kinirepa nimisākirepiretaāka?

<sup>31</sup> Nisāpiretai hīte. Hinikasaaki, hiātakasaaki, ikinipoko hīkamakasaaki, hīkamariko ikinika Teoso ereka inini imarotiko ĩkapani. <sup>32</sup> Kona hītxīkitakapiri, Xoteoakori, Xoteo minakaniu,

kākiti Xesosi sākire auiākani pakini kaminiri maerekati. <sup>33</sup> Ninirekari ikinimane kākiti nireēkiti nikamini, ikinika nikamakasaaki. ! Ninirekari erekari notanani ĩkapani. Ninirekari erekari itomaneri ĩkapani, imaerekanina Xesosi makatxakini ĩkapani.

## 11

### *Sitoākini Xesosi Sākire Auiākani*

<sup>1</sup> Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. <sup>2</sup> Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

<sup>3</sup> Ninirekari himarotiniiri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. <sup>4</sup> Ininiā kiki ikii māka imamakax-akakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

<sup>5</sup> Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa. <sup>6</sup> Okii māka omanirekakaniā, ininiā okisauakaiākotaākako. Opētauatiniā, okii kixākiko xika, oiāko kisauakiko xika, ininiā iusaaki okii māka otaka. <sup>7</sup> Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini ĩkapani. Sito kamaāka oītaniri ereka oerekini ĩkapani. <sup>8</sup> Merepitipanika Teoso kona kamari kiki sito ĩtoā. Teoso kamaro sito kiki ĩtoā. <sup>9</sup> Kiki kona kamaāka sito ĩkapani. Sito kamaāka kiki ĩkapani. <sup>10</sup> Ininiā oa takari okii māka. Ikara atoko ininiā, oerekari

oauītetiniri oītaniri. Iuasaaki Teoso nitiriakori iaxitikini apaka imarotari oauītetiniri oītaniri.

<sup>11</sup> Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. ! Apakata kikinoka auiniā.

<sup>12</sup> Kotxi sito ina kiki ītoā. Eereka ikinipoko kiki iponaniā sito ītoā. Ikara atoko itxapitikama, Teoso kamari ikinipoko. <sup>13</sup> Hīteka hīxinikapiretari ia: Sito kii māka mauakaniā, iuasaaki atāokani Teoso omisākiretini? <sup>14</sup> Kākiti itotakiti oerekaua kiki ītanoiākori pētatiko. <sup>15</sup> Sito auiniā oiāko paītanori, oōuikari oiāko, kotxi oiāko sikaāka okii ipatakari īkapani. <sup>16</sup> Kākiti nirekiniāri ineenamauatini iākotxi pirena xika, ininiā kona ate, ikinika Teoso sākire auīākani pakini !auari ikara. Ininiā ! apaniātai ikara atoko inakari hīkamini.

### *Xesosi Ipinini Xinikiko Kiiniriti*

<sup>17</sup> Uatxa niōkatsopatakitiā kona niuikai, kotxi hāpotiitakasaakiua, apia erekari kona hīkama. Apiata maerekati hīkama. <sup>18</sup> Merepanika nikenakopiretari hāpotiitakasaakiua Teoso misākiretiko aikotiā hītaparakienatakiniua. Nixinikari ipixini ikara nikenakopiretakiti atāo inini. <sup>19</sup> Apanakini oerekakiti atāo minakati auapitika hīte sauaki. Akenakotakasaakiri ninoa oerekakiti, aimarotari Teoso !apokaerekatana ninoa. Iua apokaerekatana iua sākire atāo inakari oerekakani. <sup>20</sup> Hāpotiitakasaakiua, kona atāo hīkamari kiiniri, Apiananiri ipinini xinikiko kiiniriti. <sup>21</sup> Kotxi hinikasaaki, himixirikari hīkiena apanakini nikiniri apisapanika. Ininiā apanakini natxita, apanakini poāta iuasaaki. <sup>22</sup> Auapitika haāpoko hinikini īkapani, hiātini

īkapani. Hāpotiitakasaakiua, homanatarī apanakini Xesosi sākiŕe auīākanī. Hīkamapētatarī aītariakori matiini. Kiripa nitxai hīte? Atxiīti hinirekari niuikinii? Kona xatiki niuikai hīte.

<sup>23</sup> Apiananiri sāpiretakiti notamoni, iua atokotxikana nisāpiretapekai hīte. Ia nisāpiretai: Īkanōka Apiananiri Xesosi mīkapiritiko ōtisaaki, iua kosekari komiri. <sup>24</sup> Iuasaaki imisākiretari Teoso: “Erekapitikari ia komiri pisikakiti atemoni,” itxa. Iposo atoko imaxiōpekari iua komiri, sika itxari imoianariakorimoni. Itxana: “Apakapa, nika hītxako. Ia niīto okaāka hīte īkapani. Ia komiri hinikasaaki, hīxinikanoko nota. Hīxinikari nipinini hīte īkapani,” itxa. <sup>25</sup> Ninoa nipokotaka atoko, mitxi komiri ikosekini atokokana, ikosekari iākoanatxi. Iuasaaki itxana: “Ia iākoanatxi oerekari Teoso kamapekari ikamaenetakiti amaneri, kotxi niarēka xiketa hīte īkapani. Ia iāriā hiātakasaaki, hīxinikanoko nota. Hīxinikariko nipinini hīte īkapani,” itxa Xesosi.

<sup>26</sup> Ia komiri hinikasaaki, ia iākoanatxiākiri hiātakasaaki, hōerekari Apiananiri ipinini kākiti īkapani. Ikara hōerekiniritika iua īkorapokoriti kanapiriāko.

<sup>27</sup> Maxikatiīka kākiti nikiniāri ia komiri, maxikatiīka iātiniāri Apiananiri iākoanaākiri, ikamari maerekati, kotxi !ipaxitari Apiananiri īto, iarēka pakini. <sup>28</sup> Ia komiri hinikini apisapanika, ia iākoanatxiākiri hiātini apisapanika, erekari hīxinikiniri hākixinireē auakari. Maerekati auakasaaki, hamanaāri Teoso imakatzakiniri īkapani. Eereka ia komiri hinika, ia iāriā hiāta. <sup>29</sup> Maxikatiīka hinikiniāri, hiātiniāri, ininiā hīteka akiritari himisiritiko apokini, kotxi kona hīpaxitari



Apiananiri īto. <sup>30</sup> Ikara xika itomaneri hīte sauaki iōkapeta. Ikara xika apanakini amianata. Ikara xika apanakini ipīpeka.

<sup>31</sup> Amaerekani anitiniā, aamanainiāri Teoso makatxakiniri amaerekani, ininiā amisiritiko kona apoka. <sup>32</sup> Txamari Apiananiri apokiniāri amaerekani, imisiritaua ate uatxa, amaerekani atakanapini īkapani, ininiā eereka !imisiritauka iua sākire mauiākanikata.

<sup>33</sup> Ininiā nitariakori, hāpotiitakasaakiua Xesosi ipinini xinikiko kiiniriti īkapani, hiātapanana apanakini. <sup>34</sup> Hinatxitiniā, hinipokotako hāapoko. Ininiā hāpotiitakasaakiua ! hīkamari maerekati, ininiā Teoso ! imisiritai. Apikomoni nōtākikai ereē napokasaaki.

## 12

### *Erekari Matamatakoti Sikakiti Kākitimoni*

<sup>1</sup> Nitariakori, ninirekari himarotiniiri Erekari Matamatakoti sikakiti. ! Apakata himimarotakaniri. <sup>2</sup> Mitxi Xesosi sākire mauiākani hinakasaakiua, himisirienetaāka, ininiā hāuikari teoso kamakori masākireti teoso atāo inakari ininiua. Ikara himarotape. <sup>3</sup> Kākiti sāpiretiniāi hīte: “Maerekati kamakari itxaua Xesosi,” ininiā iusaaki himarotari Erekari Matamatakoti !auari iuamoni. Kākiti sāpiretiniāi hīte: “Apiananiri itxaua Xesosi,” ininiā iusaaki himarotari Erekari Matamatakoti auapitika iuamoni, kotxi ikara iua oerekakiti.

<sup>4</sup> Erekari Matamatakoti siākiti ikini sereti aua, iuaritika Erekari Matamatakoti ātinoka aua. <sup>5</sup> Ikini

sereti parîkatxi Teoso îkapani aua, iuaritika Api-ananiri âtinoka aua. <sup>6</sup> İkini sereti Teoso kamakiti aua kâkiti îkapani, iuaritika Teoso âtinoka aua.

<sup>7</sup> Erekarî Matamatakoti iuaka oerekaua kâkitimoni, ikinimane ereka inini îkapani. <sup>8</sup> Iua Erekarî Matamatakoti sikari apanakinimoni isâkire kîikiterini ininiuana îkapani. Iua Erekarî Matamatakoti sikari apanakinimoni isâkire kimarorerini ininiuana îkapani. <sup>9</sup> Iua sikari apanakinimoni Teoso sâkire iteene auikinina îkapani. Isikari apanakinimoni amianatakani imakananitinina îkapani. Erekarî Matamatakoti âtinoka aua, iuaritika ikini sereti isika kâkitimoni. <sup>10</sup> Apanakini isikaposotiireta posotiiretxi ikaminina îkapani. Apanakini isikaimaroreta Teoso sâkire isâpiretinina îkapani. Apanakini isikaimaroreta Erekarî Matamatakoti sâkirauatakasaaki imarotinina îkapani, maerekati matamatakoti sâkirauatakasaaki imarotinina îkapani apaka. Apanakini isikaimaroreta ikini sereti kâkiti sâkire isâkiretinina. Apanakini isikaimaroreta ikara sâkiretxi mimarotakoti ikenakotakasaakina, isâpiretinirina iua kenakotakani ninoa sâkireẽ ninoa apaka imarotiniri îkapani. <sup>11</sup> Âtinoka Erekarî Matamatakoti aua. Iuanokara parîkauata ikara atoko. Isikari ikara isikakiti kâkitimoni inireẽkiti iaõka.

### *Kristo Îto Pirena*

<sup>12</sup> Kâkiti îto âtinoka aua, iuaritika aua ikii, ikanoke, iuako, itapike, ikiti, txaãpota. Itori ikara atoko inakari aua îtotxiã, iuaritika âtinoka îtotxi aua. Iua atokokana itxa Kristo îto. Xesosi sâkire

auiãkani Kristo ãto atoko itxauana. <sup>13</sup> Atxiãti Xoteoakori atxaua. Atxiãti Xoteo minakaniua atxaua. Atxiãti nitiritxi amotakoni atxaua. Atxiãti nitiritxi minakatiua atxaua. Iuaritika ãtika ãtotxi atoko atxaua, kotxi Erekarî Matamatakoti ãtinoka inakari apoka atemoni. Iua apotiitaua ãtika ãtotxi atoko anini ãkapani. Iua aua aãkixinireẽ.

<sup>14</sup> Kãkiti ãto ãtinoka aua, iuaritika aua ikii, ikanoke, iuako, itapike, ikiti, txaãpota. ãtotxiã kaiãopokori aua. <sup>15</sup> Ininiã ! apakata kiãtãti sãpiretiniã: “Uakõtxi ! nitxaua, ininiã ãtotxiã auakari ! nitxaua.” Ikara atoko isãpiretiniã, iuaritika ãtotxiã auakaripitikara kiãtãti. <sup>16</sup> Kenakokitxi sãpiretiniãri: “Okãtãti !nitxaua, ininiã ãtotxiã auakari !nitxaua.” Ikara atoko isãpiretiniã, iuaritika ãtotxiã auakaripitikara kenakokitxi. <sup>17</sup> ãtotxi okãtãtinoka auiniã, kanatokopa itxa kãkiti kenakorauatini? ãtotxi kenakokitxinoka auiniã, kanatokopa itxa kãkiti imixikarauatini? <sup>18</sup> Teoso kamari ikinika ãtotxiã auakari. Iua inireẽkiti iaõka ikaminana ninoa. <sup>19</sup> ãtinoka ãtotxi auakiti auiniã, ãtotxi !auari. <sup>20</sup> ãtotxiã auakani itori aua, iuaritika ãtotxi ãtinoka aua.

<sup>21</sup> Okãtãti kona posotari isãpiretiniri uakõtxi: “Kona nota nirekai pite.” Apaka kiãtãti kona posotari isãpiretiniri kiãtãti: “Kona nota nirekai pite.” <sup>22</sup> Kona ikara atoko itxa. Atxiãti auãkatari ãti aãto auakari ! itxa, kotxi ! kataparari, iuaritika ikara mauakaniã, aãto ! iparãkauata atão. <sup>23</sup> Kãkiti tiretari iãtoã auakari poiãori kãkiti atamatakiti. Ipatari apanakini iãtoã auakari kãkiti matamatakani ãkapani. <sup>24</sup> Aãtoã auakari apiata apotxitakiti aua apaka. Kona apatari

ikara. Apanakini aītoā auakari Teoso takari aītoā iteene apaxitini īkapani. <sup>25</sup> Ininiā Teoso kamari ītotxi ātinoka inini. Ikamari ītotxiā auakani itiretakiniuana īkapani. Apanakini ītotxiā auakari naiatiniāri apanakini ītoā auakari, ! apakata. <sup>26</sup> Āti ītotxiā auakari tsiīka. Iuasaaki ikinika kākiti īto atatsiirauata. Āti ītotxiā auakari iuikaāka, ininiā ikinika ītotxi auakini poxokoniuata.

<sup>27</sup> Kristo īto atoko hītxaua hīte. Ītotxiā auakani atoko hītxaua Kristo ītoā. <sup>28</sup> Teoso sākire auiākani ītotxiā auakani atoko itxauana. Ikinī sereti parīkatxi aua ītotxi īkapani akamini īkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani. Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mimarotakinīti sākiretakani pakini. Teoso takari ikara atoko inakani parīkauatakani iua sākire auiākani imoianatinina īkapani. <sup>29</sup> Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. <sup>30</sup> Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakinīti. Ikinimane !iposotari isāpiretiniri ikara sākiretxi iua kenakotakanimoni ninoa sākireē ninoa apaka imarotini īkapani. <sup>31</sup> Auapitika ikara Erekari Matamatakoti sikakiti aparīkauatini īkapani. Iuaritika hinirekariko isikakiti apiaerekatakari. Uatxa noerekaiko isikakiti

apiaerekatakari.

## 13

### *Tiraōkitxi Pirena*

<sup>1</sup> Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini ! auari, ininiā ! apakata nimarore. Metao āsokiko ene atoko nitxa. Ipi panera tore āsokiko ene atoko nitxa. <sup>2</sup> Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakiniti. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxirataro nipaniātini ātiātaā isini. Txamari iuasaaki nitiraōkiuatini ! auari, ininiā minakati nitxaua. <sup>3</sup> Atxiīti nisikari ikinipoko nitii, nitxineirote pakini matxineirotenimoni. Atxiīti nauiritari niito arikiko. Txamari iuasaaki nitiraōkiuatini ! auari, ininiā !apakata.

<sup>4</sup> Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekari ātimoni. Pitiraōkiuatakasaaki, kona pixikotari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, ! piuikaua.

<sup>5</sup> Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekari piteka nireēkitinani. Pitiraōkiuatakasaaki, ! katimari pomanākarauatini. Pitiraōkiuatakasaaki, ! pixinikapinikari maerekati apanakini kamakiti pitemoni. <sup>6</sup> Pitiraōkiuatakasaaki, kona pipoxokoniua āti kamakasaakiri maerekati. Pitiraōkiuatakasaaki, pipoxokoniua atāo inakari

pikenakotakasaaki. <sup>7</sup> Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki, pauikari kākiti kamaenetakiti ikamini. Pitiraōkiuatakasaaki, ! katimari pitakanapiniri piparīka pikamini. <sup>8</sup> Tiraōkitxi !ixipoka. Txamari kākiti sāpiretakiti xipokapitikako. Kākiti sākiretiniri āti uāka sākire xipokapitikako. Kākiti imarore ereēkokapitikako. <sup>9</sup> Kotxi poiāonoka aimarore. Poiāonoka Teoso sākire aimarota asāpiretini. <sup>10</sup> Āti ōti aimarotari ikinipoko atāo inakari. Iusaaki atāo minakati !auaika. <sup>11</sup> Amarini ninakasaakiaua, nisākirauata amarini sākirauatini atokokana. Iusaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iusaaki. Txamari kikipe ninakasaakiaua, ! ninirekaikari amarini atokokana nininia. <sup>12</sup> Uatxa aātamatakiti Teoso oerekakiti ! aposota iteene aātamatini. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotinino atokokana.

<sup>13</sup> Ininiā aua ipi āti pakini erekari aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi apiaerekatakari.

## 14

### *Erekari Matamatakoti Siākiti*

<sup>1</sup> Ininiā ikiniōtika hītiraōkiuatako. Hinirekariko Erekari Matamatakoti siākiti. Apiata hinirekariko iua sikinii Teoso iokanapirena hīsāpiretini. <sup>2</sup> Kākiti sākire mimarotakoti sākiretakari misākiretari

Teoso. !Imisākiretari kākiti, kotxi kākiti !imarotari isākire. Erekarī Matamatakoti posotiireē isāpiretari atāo inakari Teoso oerekakiti. <sup>3</sup> Teoso sākire sāpiretakaripekana misākiretari kākiti. Iua txīkitakari kākiti apiata auikiniri Teoso sākire. Isikataparaxiniretana ninoa. Imīkapiritari ninoa ākixinire. <sup>4</sup> Kākiti sākire mimarotakoti sākiretakari, iuaka txīkitakaua apiata auikiniri Teoso sākire. Teoso sākire sāpiretakaripekana, txīkitakari ikinika Xesosi sākire auīākani apiata auikinirina Teoso sākire. <sup>5</sup> Erekarī hīte hīkinika sākiretiniri kākiti sākire mimarotakoti. Iuaritika apiaerekata hīsāpiretiniri Teoso sākire, kotxi Teoso sākire sāpiretakari apiari itxaua. Kākiti sākire mimarotakoti sākiretakari poiāori itxaua. Iua sāpiretiniāri isākire kenakotakani ninoa sākireē ninoa apaka imarotiniri īkapani, iusaaki erekari, kotxi iusaaki itxīkitakari Xesosi sākire auīākani apiata auikiniri Teoso sākire. <sup>6</sup> Hītemoni napokasaaki, nisākiretiniāri kākiti sākire mimarotakoti, nitxīkitakatai hīte apiata hāuikiniri Teoso sākire? Konapitini. Ininiā kona itxa. Noerekiniāi Teoso oereēkiti notamoni, nisāpiretiniāi Teoso imarore, nisāpiretiniāi Teoso sākire, noerekiniāi Teoso sākire atāo hāuikini īkapani, iusaaki nitxīkitakai hīte apiata hāuikiniri Teoso sākire. <sup>7</sup> Maxinikari xikari moianatakari atxiīti viorāo, atxiīti xōkakori pakini. Kākiti mimatireni kaminiāri ikara, iusaaki xikari atāo inakari !imarotaāka. Ienenoka aua.

<sup>8</sup> Ātipekana noerekai. Trōpetā ene atāo ininiā, sotoakori kenakotakasaakiri, aiamatana ineenamauatini īkapani. Trōpetā ene na atāo ininiā, sotoakori !imarotari neenamatchi manapipe inini.

<sup>9</sup> Iua atokokana kâkiti sâkire imarotakiti himasâkiretakaniã, kiriãpa ninoa imarotari hîsâpiretakiti? Ikara atoko hîsâkirauatiniã, maxikatiïka hîsâkirauata. <sup>10</sup> Itori uâkati sâkire aua ikini itixiti. Apakata ikinika imarotiko. <sup>11</sup> Kâkiti sâkire nimimarotakaniã, ininiã notamoni iua âti tixinikiri atoko itxa. Apaka iuamoni nota âti tixinikiri atoko nitxa. <sup>12</sup> Hîte iteene nirekari Erekarî Matamatakoti siãkiti hâpakapini, ininiã apiata hinirekariko isikini isikakiti Teoso sâkire auiãkani iua sâkire iteene auikinina ïkapani.

<sup>13</sup> Ikara atoko ininiã, erekari kâkiti sâkire mimarotakoti sâkiretakari amanainiri Teoso isikaimaroretiniri iua sâpiretiniri isâkire kenakotakani ninoa sâkireẽ ninoa apaka imarotiniri ïkapani. <sup>14</sup> Teoso nimisâkiretiniã kâkiti sâkire mimarotakotiã, nixinire misâkiretari Teoso, txamari !nimarotari notaka sâkire. <sup>15</sup> Ininiã kipa atão nikamini? Ia atão: Nimisâkiretari Teoso nixinireẽ. Apaka nimisâkiretari Teoso niïkiteẽ. Nixikarauata nixinireẽ. Apaka nixikarauata niïkiteẽ. <sup>16</sup> Kâkiti sâkire mimarotakotiã hîsâpiretiniãri Teoso ereka inini, kâkiti ereẽ pisâkire mimarotakani sauaki, ! iposotari “atãopitikara” inini, kotxi !imarotari pisâpiretakiti. <sup>17</sup> Atxiïti atão hîsâpiretiniri Teoso ereka inini, txamari iusaaki kona pitxïkitakari iua kâkiti apiata auikiniri Teoso sâkire.

<sup>18</sup> Peerekari Teoso, kotxi apiata isikaimaroretano nota nimisâkiretiniri iua kâkiti sâkire mimarotakotiã. Poiãonoka hîte imarotari kâkiti sâkire mimarotakotiã himisâkiretiniri iua. <sup>19</sup> Iuaritika, Xesosi sâkire auiãkanikata nauakasaaki, apiaerekata nisâpiretinina sïkonoka sâkiretxi ninoaka sâkireẽ,



kotxi apakata ninoa imarotiniri nisäkire. Niposotiniãri sïko mio sãkiretxi kãkiti sãkire mimarotakotiã nisãpiretiniri kãkiti, itori nisäkire, iuaritika maxikatiïka nisãkirauata, kotxi kãkiti !imarotari.

<sup>20</sup> Nitariakori, !apakata himarore amarini xapitikiri imarore atokokana inini. Iuaritika amarini xapitikiri makamakaniri maerekati ãtimoni, iua atokotxikana amarini xapitikiri atoko !hïkamapiri maerekati ãtimoni. Aneëkari imarore atoko itxako hïte imarore. <sup>21</sup> Teoso sãkire iõkatsopatakori txari: Niokanatarari ãti uãka hïtemoni, hïte nimisãkiretini ïkapani. ãti tixinikini sãkireë nimisãkiretai hïte. Iuaritika kona hïkïpitari nisäkire, itxa Apiananiri.

<sup>22</sup> Ininiã Teoso sãkire auiãkari sãkiretiniãri Teoso sãkire mauiãkani sãkire, iua mimarotakiniti, Teoso sãkire mauiãkani iusaaki imarotari Teoso posotiire. Teoso sãkire auiãkari sãpiretiniãri Teoso sãkire apanakini Teoso sãkire auiãkanimoni, ninoa iusaaki imarotari Teoso posotiire. <sup>23</sup> Teoso sãkire auiãkani apotiitiniãua, ikinimane sãkiretiniãri kãkiti sãkire mimarotakotinani, iusaaki kãkiti Teoso sãkire poiãopanika imarotakari ïroiniã, Teoso sãkire mauiãkati atxiïti ïroiniã, ininiã iua uãkatai hïte mapitxiritakani hininiua.

<sup>24</sup> Txamari ikinimane sãpiretiniãri Teoso sãkire iusaaki, Teoso sãkire mauiãkati ïroiniã, kãkiti Teoso sãkire poiãopanika imarotakari ïroiniã, ininiã iua imarotari maerekati kamakari ininiua. Iusaaki imarotari imisiritiko auapitika ãti õti. <sup>25</sup> Iusaaki ikinimane imarotari iua xinikakiti ãkixinireë. Ininiã iusaaki ikapotoreëkaua Teoso apisatoõ. Itxari: “Atãopitikara Teoso aua hïte sauaki,” itxa.

### *Kākiti Apotiitakasaakiua Teoso Apisatoō*

<sup>26</sup> Nitariakori, kanatokopa itxa Teoso sākire auiākani apotiitakasaakiua? Aāpotiitakasaakiua, akinika aminari xikari Teoso īkapani. Akinika iposope Teoso sākire aōerekini atāo aimarotini īkapani. Akinika iposope Teoso oerekakiti asāpiretini. Akinika iposope kākiti sākire mimarotakoti asākiretini. Akinika iposope iua sāpiretakiti asāpiretini ikinimane imarotiniri īkapani. Ikara atoko itxa aāpotiitakasaakiua Teoso apisatoō. Iusaaki makamari ikinika, Teoso sākire Teoso nakitiakori apiata auikini īkapani. <sup>27</sup> Iusaaki kākiti sākiretiniāri kākiti sākire mimarotakoti, ipinoka kākiti kamari ikara atoko inakari, atxiīti ipi āti pakini kamari ikara atoko inakari. !Apakata apikomoni kākiti sākiretiniiri kākiti sākire mimarotakoti iusaaki. Āti sākirauatakasaaki, apanakini kenakotari. Ātinoka sākirauata iusaaki. Isākirauataka atoko, āti sāpiretari isāpiretakiti isākire mimarotakani sākireē, isāpiretakiti imarotinina īkapani. <sup>28</sup> Iusaaki isākire sāpiretakari mauakaniā, !apakata kākiti sākire mimarotakoti sākiretakari sākirauatini. Erekari ākixinireē isākirauatini Teosokata.

<sup>29</sup> Kākiti apotiitakasaakiua Teoso apisatoō, iusaaki ipi, atxiīti ipi āti pakini Teoso sākire sāpiretakani sāpiretariko Teoso sākire. Iusaaki apanakini xinikariko iua sāpiretakiti, atāo inini imarotini īkapani. <sup>30</sup> Topākakari xinikasaakiri apikomoni Teoso oerekakiti, ininiā iusaaki sākirauatakari iotoka, Teoso oerekakiti topākakari sāpiretini īkapani. <sup>31</sup> Ikara atoko ininiā ikinimane posotari Teoso sākire isāpiretinina. Teoso sākire

sāpiretakani āti sākirauata, eereka āti sākirauata. Ikara atoko itxaāpotana. Ininiā ikinimane oerekaākako. Ikinimane sikataparaxiniretaākako. <sup>32</sup> Teoso sākire sāpiretakani posotari iātapiniri Teoso oerekakiti isāpiretini ĩkapani. <sup>33</sup> Kotxi Teoso kona potxitari ienenoka auini. !Apakata kaiāopokori sākirauatini, kotxi apanakini !imarotari ninoa sāpiretakiti. Neenamatchi atoko itxa. Teoso nirekari inakitiakori kamakiti atāo inini apotiitakasaakiuana iua apisatoō.

<sup>34</sup> !Apakata sito sākirauatini hāpotiitakasaakiua Teoso apisatoō. !Auritaāka osākirauatini iusaaki, kotxi Teoso sākire iōkatsopatakori paniātaro sito kaminiri kiki paniātakiti. <sup>35</sup> Ninoa nirekiniāri ipimarauatinina imimarotakiniti imarotinina ĩkapani, ininiā ninoa pimaāna ĩtanirina aapokona apokasaakina. Sito sākirauatiniā kākiti apotiitakasaakiua Teoso apisatoō, kākiti pētauata oa sākirauatini xika.

<sup>36</sup> Hīte kona apokaerekatatari nisāpiretakiti? Atxiīti hīte kamari Teoso sākire? Konapitini. Atxiīti Teoso sākire iokanataāka hītenanimoni? Konapitini.

<sup>37</sup> Teoso sākire sāpiretakani hininiāua, Erekari Matamatakoti siākiti auiniāi, ininiā iusaaki himarotari ikara nisākire niōkatsopatakiti Apiananiri paniātakiti inini. Hīsāpiretariko hāuikiniri ikara. <sup>38</sup> Himamaākatakaniāri ikara nisākire, apanakini ! imaākatari hīte sākire.

<sup>39</sup> Ininiā nitariakori, iteene hinirekariko Teoso sākire hīsāpiretini. Apaka hāuiritariko kākiti sākire mimarotakoti sākiretiko. <sup>40</sup> Ininiā hīkamariko ikinika atāo hāpotiitakasaakiua Teoso apisatoō, Teoso sākire ikinimane kenakotini ĩkapani.

# 15

## *Xesosi Ōkitikiniua Pirena*

<sup>1</sup> Nitariakori, uatxa iuaīkana ninirekari hīte xinikiniri Teoso iokanapirena erekari hītemoni nisāpiretakiti. Hīte apakapapekari ikara nisāpiretakiti. Hīte iteene auikari ikara.

<sup>2</sup> Ikara Teoso iokanapirena erekari oerekai himaerekani makatxakiko. Ininiā atāo hīxinikariko ikara nisāpiretakiti. Iteene hāuikiniāri Teoso iokanapirena erekari, himaerekani makatxakaāka. Atāo minakati hāuikiniā, ininiā maxikatīka hāuikari.

<sup>3</sup> Nisāpiretapekai mitxi nota apakapakiti, kotxi ia himimarotakaniā !apakata. Ia napakapakiti: Kristo ipina amaerekani imakatxakini īkapani. Teoso sākire iōkatsopatakori sāpiretaua ikara.

<sup>4</sup> Eereka ikataāka. Ipi ōti, āti ōtisaaki iuaīkana ōkitikaua. Teoso sākire iōkatsopatakori sāpiretaua ikara. <sup>5</sup> Eereka Petro atamatari iua. Eereka ikinika Kristo moianariakori atamatari iua.

<sup>6</sup> Eereka kiētosi aītariakori atamatari iua āti ōti apotiitakasaakiuana. Kaiāopanikani ninoa auapanika. Ātikaka ipīpe. <sup>7</sup> Eereka Txiako atamatari iua. Eereka ikinika Xesosi iokanatakini atamatari iua. <sup>8</sup> Imapotōkire nota apaka atamatari iua. !Natamatari Xesosi īkorapokoriti itīpokotakasaaki. Eereka iua apoka notamoni.

<sup>9</sup> Xesosi iokanatakiti poiāori nitxaua. Apanakini iua iokanatakini apiata. Mitxi !erekari nikamakiti, kotxi nimisiritana Xesosi sākire auīākani Teoso nakitiakori, iuaritika Xesosi akiritano iua iokanatakiti nininiua. <sup>10</sup> Teoso sikari ikinipoko erekari notamoni, ininiākara iua iokanatakiti kākitimoni nitxaua. Kona

maxikatiīkani isikari ikinipoko erekari notamoni, kotxi iteene niparīkauata Teoso īkapani. Apanakini Xesosi iokanatakini iteene parīkauata, iuaritika nota parīkauata apiata. Kona nota posotiireēni niparīkauata. Ikinipoko erekari Teoso sikakiti notamoni sikaposotiiretano nota niparīkauatini īkapani. <sup>11</sup> Atxiīti nota sāpiretai ikara Kristo sāpiretakiti. Atxiīti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hīte auika.

### *Ipīkani Ōkitikiko Pirena*

<sup>12</sup> Ate sāpiretai Kristo iuaīkana Ōkitikiniua. Ininiā kinirepa ātikaka hīte txari ia? “! Auari ipīkani iuaīkana Ōkitikiniua,” hītixa. <sup>13</sup> Ipīkani iuaīkana Ōkitikiniua mauakaniā, ininiā Kristo apaka kona Ōkitikaua. <sup>14</sup> Kristo mōkitikakaniāua, ininiā maxikatiīka asāpiretai iua sākire. Kristo mōkitikakaniāua, maxikatiīka hāuikari iua sākire. <sup>15</sup> Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua Ōkitikiniri Kristo. Ipīkani iuaīkana Ōkitikiko mauakaniā, Teoso kona Ōkitikari Kristo. <sup>16</sup> Kotxi ipīkani iuaīkana mōkitikakaniāua, Kristo apaka kona Ōkitikaua. <sup>17</sup> Kristo iuaīkana mōkitikakaniāua, maxikatiīka hāuikari iua sākire, kotxi ! imakatzakari himaerekani. <sup>18</sup> Kristo iuaīkana mōkitikakaniāua, ipīkani iua sākire auīākani pīpinanaka. <sup>19</sup> Xesosi mōkitikakaniāua, iuaritika ikiniōtika ate auikari iua sākire īkorapokoriti aāuakasaaki, ininiā miikiteni apiarini atxaua ate.

<sup>20</sup> Ikara na atāo. Uatxa maxinikari atāo inakari. Kristo ipīkaripeka Ōkitikapeēkaika. Iua amātiiri merepitipanika auakari atoko itxa.

Iua merepanika ōkitikaua, ininiākara aimarotari apīkasaaki ate apaka ōkitikaua. <sup>21</sup> Āti kiki kamakitiā ipīkitxi apoka ikinimanemoni. Iua atokokana āti kiki kamakitiā, ipīkani ōkitikiko apoka. <sup>22</sup> Adāo kamakitiā ikinimane ipina. Kristo kamakitiā iua sākire auiākani auapininiika ātipirika. <sup>23</sup> Kākiti ōkitikaāka ia atoko. Kristo mitxi ōkitikaua. Iua merepanika ōkitikakariua. Ikanapiriākasaaki iua nakitiakori ōkitikauako apaka. <sup>24</sup> Eereka itixi xipokaāka. Iuasaaki ikinika auītetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. <sup>25</sup> Kristo ikinimane auīte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. <sup>26</sup> Imokaiakari atoko itxa ipīkitxi. Imokaiakariakori ixipokasaaki, imapotōkire ixipokari ipīkitxi. <sup>27</sup> Teoso sākire iōkatsopatakori txari:

Teoso takapekari ikinika iua kiti patapi.

Ikara Teoso sākireē “ikinika” aua, iuaritika aimarotari iuaka !itakaua Xesosi kiti patapi, kotxi Teosora txīkitakari Xesosi ikinimane auīte ininiua. <sup>28</sup> Kristo ikinimane auīte inakasaakiua, iua Teoso ākiri auītetariko Teoso, kotxi mitxi Teoso txīkitakari iua ikinimane auīte ininiua. Iuasaaki Teosonoka ikinimane auīte itxaua.

<sup>29</sup> Ipīkani mōkitikakaniāua, kinirepa apanakini patxisataāka ipīkani ōkitikiniua īkapani?

<sup>30</sup> Atepekana, ipīkani mōkitikakaniāua, kinirepa ikiniōtika amīteenekari monōkori? <sup>31</sup> Nitariakori, nimarotari ipīkitxi monōkori ikiniōtika. Ikara nisāpiretai, kotxi niuikai hīte. Niuikari aūuni aūuīte Kristo Xesosikata. <sup>32</sup> Uai Épeso sitatxitiā kākiti ākiti kaneenamari atoko inakani nirekari

imaĩkinino nota. Ipĩkani mōkitikakaniãua, kinirepa nimĩteenekari ikara atoko inakari? Ipĩkani mōkitikakaniãua, ininiã atxari:

Manipokota, maiãta, kotxi katana apinako.

<sup>33</sup> Kona hãuiritapiri ãti misirienetini. Kãkiti erekari moianatiniãri maerekati kamakani, ninoa txĩkitakari iua maerekati kamakari ininiua. <sup>34</sup> Himerekako. Himarotariko atão inakari hĩkamini ĩkapani. Maerekati ! hĩkamapinikako. Hĩpētauatako, kotxi apanakini hĩte ! imarotari Teoso.

### *Kãkiti Ĩto Ōkitikasaakia*

<sup>35</sup> Atxiĩti ãti txari: “Kanatokopa itxa kãkiti ōkitikiko? Iuasaaki kanatokopa inakaripa ĩto?” itxa. <sup>36</sup> !Kiĩkiteri kãkiti pimarauatini ikara atoko. Takariki, pimatatakaniãri kipatxi ãki ! ipitxaka. <sup>37</sup> Pitakarauatakasaaki, pitakari okinoka, atxiĩti triko, atxiĩti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni. <sup>38</sup> Teoso kamari takari pitxere ĩnreēkiti iaōka. ĩkini takariki Teoso sikari ipitxere. <sup>39</sup> Ĥti xinitxi kona ãti xinitxi atokoni. Aua kãkiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

<sup>40</sup> Aua iaxiti apiko nopinixiti auakani, aua itixi takote auakani apaka. Peereri ĩkinipoko, iuaritika iaxiti apiko nopinixiti auakani ipinimoni, itixi takote auakani ipinimoni. <sup>41</sup> Peereri atokatxi. Peereri kasiri apaka, txamari kasiri ãtião. Peereri iōriki apaka, txamari iōriki ãtião. Apaka ãti iōriki ãti iōriki atokotxikana !auari.

42 Iua atokokana itxa ipīkani iuaīkana ōkitikikosaaki. Ītotxi ixiti taākori ! auaika. Iua ōkitikakori kona ipinaika. 43 Ītotxi katikosaaki, ! erekari. Ītotxi iuaīkana ōkitikikosaaki, peerekari. Ītotxi katikosaaki ! kataparari. Iuaīkana ōkitikikosaaki, kataparari. 44 Aīto katikosaaki, aīto itixi auakani ĩto atokotxikana. Aīto iuaīkana ōkitikikosaaki ātiāo aīto. Ītotxi ĩkorapokoriti aāuini ĩkapani aua. Apaka aua ĩtotxi ipinimoni, Teoso sikakiti apīkasaaki. Ikara ĩtotxi ! ipina. 45 Teoso sākire iōkatsopatakori txari:

Teoso txīkitakari kiki merepitipanika auakari Adāo inakori auāki inini.

Adāo imatonōkari auakari, Kristo inakori, txīkitakari kākiti auāki inini, apaka imapinakani ĩkapani.

46 Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti.

47 Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua.

48 Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana.

49 Aponaniākasaaki, kipatxi kamakori aīto, Adāo ĩto atokokana itxa aīto. Iua atokokana Teoso tixinekiri ĩto, Kristo ĩto atokokana itxako aīto.

50 Nitariakori, nisāpiretai hīte, ! apakata kākiti ĩto, iarēka pakini sini Teoso auītetxi ininiātaāua. Ipinakari kona auapininiika ! itxa. 51 Hīkenakotariko nisākire. Nisāpiretaiko kākiti mimarotakiniti mitxi. Kona ikinimaneni ipina. Iuaritika amakinika txīkitakaāka ipinipo



aniniua. <sup>52</sup> Iuasaaki imapotōkire trōpetakero xōkaāka. Iuasaaki mēkokari katimari atoko itxa. Poki katimari matākaātini atoko itxa. Amakinika katimaritika txīkitakaāka ipinipo aniniua. Iua trōpeta xōkikosaaki, iuasaaki ipīkani ōkitikaāka. Kona ipinaikanako. Iuasaaki atxīkitakaāka ipinipo aniniua. <sup>53</sup> Kotxi arakakani txīkitakaākako miarakakani ininiua. Ipīkani txīkitakaākako mipīkani ininiua. <sup>54</sup> Arakakani txīkitakikosaaki miarakakani ininiua, apaka ipīkani txīkitakikosaaki mipīkani ininiua, iuasaaki Teoso sākire iōkatsopatakori apopeka. Ia atoko itxa Teoso sākire kitxakapirīka:

Ipīkitxi xipokaākako. Auape kāiatakari, ipīkitxi xipokakari.

<sup>55</sup> Ipīkitxi tsi !auaika. Maerekani misiritikoātaā anikakari kona kāiata.

<sup>56</sup> Ipīkitxi tsi mitxi aua amaerekani xika. Teoso paniātakiti iōkatsopatakori oerekaua amaerekani. Teoso paniātakiti iōkatsopatakori mauakaniā, !auari kākiti misiritiko. Txamari maerekanitxi tapara aua, kotxi Teoso paniātakiti iōkatsopatakori auapitika. <sup>57</sup> Erekapitikari Teoso, kotxi aāuīte Xesosi Kristo txīkitakaua akāiatini.

<sup>58</sup> Ikara atoko ininiā, nitariakori nota tirketakini, kataparaxinire hītxako. Kona hāuiritapiri apanakini txīkitakinii maerekati hīkamini. Hīparīkauatako ikiniōtika Apiananiri īkapani, kotxi himarotari maxikatiīka !hīparīkauata iua īkapani. Hīparīka īki hāpakapapitikako.

## 16

*Txineiro Sikiko Xesosi Sākire Auiākani Īkapani*

<sup>1</sup> Uatxa nisāpiretai txineiro himakatzakini Teoso nakitiakori ĩkapani. Hĭkamariko Karásia tixini auakani nĭpaniātini atokotxikana. Nĭpaniātana ninoa Teoso misākiretikoātaā apotiitakaniua ia atoko: <sup>2</sup> Ikini Tomĭko hĭkinika hĭte nĭkataro txineiro ninoa ĩkapani. Txineiro Teoso siākiti iaōka, hinĭkatari ipixini ninoa ĩkapani. Ininiā ereē napokasaaki apikomoni txineiro kona apotiitaāka. <sup>3</sup> Napokasaaki ereē, niokanatarī kākiti, txineiro hĭsikakito anĭkakani Xerosareēmoni. Hĭsāpiretano hĭokanatsopatakitiā himereēkini hĭtxineirote anĭkakani ĩkapani. <sup>4</sup> Atxiĭti erekari nota sini apaka, ininiā ninoa moianatano nota.

### *Paoro Paniātakiti Pirena*

<sup>5</sup> Masetónia tixinimoni nisako, eereka napoka hĭtemoni, kotxi nisapitikako Masetóniamoni. <sup>6</sup> Iuasaaki atxiĭti nikaikota hĭtekata. Atxiĭti nikaikota mitaāsaaki hĭtekata. Ininiā eereka hĭte posotari himoianatinino nota naiamatakasaaki apikoxiti nisini ĩkapani. <sup>7</sup> Kona ninirekari mapaōtinoka nikaikotini hĭtekata uatxa. Apĭananiri auiritiniāno, ninirekari apikomoni nikaikotini hĭtekata. <sup>8</sup> Txamari nikaikota uai Épeso sitatxiti Pĕtekósitxi kiiniriti manapi ōti. <sup>9</sup> Kotxi uatxa kaiāopokori kākiti ĩkorapokoriti auakani nirekari nisāpiretiniri Teoso iokanapirena erekari ninoamoni. Txamari kaiāopokori kākiti ĩnĭrekano. <sup>10</sup> Atxiĭti Tximótxio sari hĭtemoni, ininiā hāpakapariko iua, ĩmapĭkarauatakani ĩkapani hĭte sauaki, kotxi iua parĭkauata Apĭananiri ĩkapani nota parĭkauatini atokokana. <sup>11</sup> Ininiā kona apakata kākiti mamaākatakaniri iua.

Ikanapiriākasaaki notamoni, iusaaki h̄ōkanatari iua erekaxinire inini. Niātapari iua aītariakorikata.

<sup>12</sup> Iteene ninirekari aītari Aporo apokini h̄itemoni aītariakorikata. Txamari uatxa !inirekari isini h̄itemoni, iuaritika iposotakasaaki isapitikako h̄itemoni.

<sup>13</sup> Araōkire h̄ītxako. Iteene h̄auikariko Teoso sākire. H̄ītaparaxinireritika h̄auako. H̄ītapararitika h̄auako Teoso īkapani. <sup>14</sup> Xesosi tiraōkiā ikinipoko h̄īkamako.

<sup>15</sup> H̄īte imarotari Esitépana, inirimane pakini. Ninoa Akaia tixini auakani. Iuaātaā ninoa merepitipanika auikari Xesosi sākire. Ninoa iteene parīkauata Teoso nakitiakori īkapani. Nitariakori, iteene nipaniātai h̄īte. <sup>16</sup> H̄īkamariko kākiti ikara atoko inakani paniātakiti. H̄īkamariko ikinimane amoianari paniātakiti, atekata parīkauatakani paniātakiti. <sup>17</sup> Esitépana, Potonato, Akaiko pakini apokasaaki uai, nipoxokoniua, kotxi iminarina notamoni mauakati h̄īte masakakiniti. <sup>18</sup> Ninoa sikapoxokonitari nākixinire, h̄īte ākixinire apaka. Erekarī ate iuikiniri kākiti ikara atoko inakani.

<sup>19</sup> Teoso misākiretikoātaā apotiitakaniua Ásia tixini auakani xinikamanapitai h̄īte. Ákira inakori, Pisisira inakoro pakini iteene xinikamanapitai h̄īte, kotxi Apiananiri nakiti h̄ītxaua. Apaka Xesosi sākire auiākani ninoa aapoko apotiitakaniua xinikamanapitai h̄īte. <sup>20</sup> Ikinimane aītariakori uai auakani xinikamanapitai h̄īte. Haōkitakakasaakiua, himaratakakauako, kotxi Teoso nakitiakori h̄ītxaua.

<sup>21</sup> Nota Paoro iōkatsopatari ia nitakapiretanapini niuakoã. <sup>22</sup> Kākiti matiretakaniāri Apiananiri Xesosi Kristo, maerekati takaãka iua nopini.

“Apiananiri, uai pina atemoni,” atxari Xesosi.

<sup>23</sup> Apiananiri Xesosi Kristo sikari ikinipoko erekari hītemoni. <sup>24</sup> Nitiretai hīte hīkinika, kotxi Kristo Xesosi nakitiakori atxaua. Ameẽ.

**Teoso sãkire amaneri**  
**New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

**Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 13 Jul 2024 from source files  
dated 29 Jan 2022  
253eaec7-f0c7-5b49-b6be-65ee5354d0ed